

DIARIO DE RA MARIGHEZA

2008 / 2009

de

***FIORENZO GASPARI
LEON***

Diàrio de ra marighéza

2008 / 2009

de

Fiorenzo Gaspari

León

Anno Domini MMVIII ai 25 de mârzo, mârtes dapò Pašca: ancuói sòn štà betù Marigo de ra Règola Òuta de Lariéto.

28 de mârzo, véndres: sòn şù in Casa Rurale, adùna col prin Šenico, Andrea Menardi Diorništa, a béte ra firma sui cónte de ra Règola, sènpre ancuói sòn pasà in Règola a firmà òutra cartes che interèsa ra marighéza.

30 de mârzo, domégna: fòula grànda de ra Règoles.

1 de aprile, mârtes: éi štà şù a l'Ošpedà adùna con i dói Šeniche: Andrea Menardi Diorništa e Alberto Dimai Luštro a véde sul pòšto ra Jéja, gòuja che ai zinche de što més 'l é 17 cùbies de "špòşe" che fèš 35 ane de maridòzo e dapò dišnà se marida el nòš Capocomùn Andrea Franceschi de Matia con Martina Toresan, éi švoità ra caséta dei sòde dei donatie de ra ciandéres.

3 de aprile, şóiba: gòuja el fiédo de ra štajón, adùna col Luštro, ón portà sù dóa bónboles de gas par šoudà inze, inze Jéja, Carlo Dantógna m'à inpreštà 'l canón a gas.

9 de aprile, mèrcui: prima fòula de ra Deputaziòn de ra Règoles, da Marigo. Sèe in Toscana alcuànte dis e sòn vegnù sù apòšta par ra sesiòn de Deputaziòn, a vienì in sù con r'automòbile, i m'à anche petà inze con un camion, éi abù alcuànte dàne...

14 de aprile, lùnes: Diego Gaspari Moròto el m'à domandà de se podé maridà inze Jéja de l'Ošpedà ai 29 de şugno, éi dito de ši, el m'à parlà anche del conzèrto del Coro Cortina, de agòšto, ai dói da daséra.

15 de aprile, mârtes: éi telefonà a dùte i paróì dei bešteàme forèšte: Badia, Marebbe, e S. Lorenzo. Ancuói m'à anche telefonà Rina Caldara Partel par me domandà alòšo sù a l'Ošpedà, gòuja che ra se coméda fòra ra ciàša de Mortija.

16 de aprile, mèrcui: sesión de giunta, da res sié e mèşa fin res diés e un cuàrto da daséra.

19 de aprile, sàbeda: adùna con i dói Šenìche e 'l Cuiétro Rinaldo Zangiacomi Zachèo, sòn şùde a tuói su ra prenotaziós dei bešteàme: Badia, Marebbe e S. Lorenzo.

20 de aprile, domégna: 25 ane de prèe de don Francesco De Luca, portišión e Mésa Grànda, in zi banche de r'autoritàs.

25 de aprile, véndres: sènpres con Alberto Luštro, secóndo Šenìco, ón laà ra ciàines (collari) de l'àn pasà, fòra inze ra sò botéga de Piàn da Lago.

26 de aprile, sàbeda: adùna con ra comišión agricultùra, sòn şùde sul luó par ciatà fòra dootré site agnóche se podarà fei sù štàles par i bešteàme. Dapò dišnà éi betù a pòšto ra ciàines con dute i numere dal 1 fin al 120. (Ra ciàines del di d'ancuói es 'é de téra e plaštica, cheres de 'na òta ş'èa de fèr, chera saràe ra véra ciàina).

27 de aprile, domégna: el Luštro, secóndo Šenìco, m'à portà duta ra cartes de ra sò marighéza, con una gràn bèla dèdica, che m'à fato şpontà 'na lagrema. Vès séra sòn şùde su a l'Ošpedà a se tuói ra ròba vanzàda de i špoşalizie, coši éi podù parlà con chi pize de Zàn che à tolés sù r'oštaria de l'Ošpedà: Ida e sò fiói e ón organişà 'na fré pa ra portišión de i 15 de màšo.

28 de aprile, lùnes: da daséra sòn ciatà inze ra sàles de Amici Club, gòuja dei 800 ane de ra Jéja de Saiàco, de i 2 de màšo.

29 de aprile, màrtres: ancuói éi feni de ši a tuói su ra prenotaziós dei bešteàme: Menegùto e Partel, dapò dišnà sòn şù su a l'Ošpedà a me tuói i doi farài par ra portišión dei 800 ane de Saiàco.

30 de aprile, mèrcui: vès sera m'à ciamà da Picolin Giuseppe Videsott par me mandà a dì che 'l èa mòrto Mattia Winkler, un pàor da Rina che 'l é 30 ane che 'l montéa i sò bešteàme cà in Anpézo e che 'l s'inderetéa par dute i pàor da Rina che montéa cà su ra nòštra mόνte de Ra Štua, e che i lo seporiše véndres da res dóes e mèşa a Antermoia, vardarón de èse là.

2 de màšo, véndres: adùna con: Mario Ròco, Gianfranco Coletìn, Claudio de Chéco, Angelo Bròco e 'l paštór Umberto Lucabèca, de i ultime marighe manciàa solo Alberto Luštro, sòn şùde a ra sepoltura de Mattia Winkler a Antermoia, 'l èa anche Giordano Nando, par conto sò...

Da daséra 'l é štà ra fèšta de Saiàco, 800 ane de ra nòštra Jéja, portišión con i dói Marighe de Règola Òuta, ió e Luciano Agnèl davànte con i farài de S. Nicolò, Mésa Grànda col Veščovo de Udine Pietro Brollo e beberèla dapò Mésa, inze piàza.

4 de màșo, domégna: Prima Comugnón, portișiòn con i Confarói, col presidènte de ra Règoles, Cinzia Ghedina de Ugo de Antonia, a màn zànca del presidènte el Marigo de Règola Òuta de Lariéto e a màn dréta el Marigo de Anbrizòra, ra gòuja de cheșto? Ra dóa Regola Outes s'è: una a màn dréta de ra Boite, Anbrizòra e cheròutra, Lariéto, a màn zànca, Mesa Grànda e beverèla inze piàza.

6 de màșo, màrtes: prima sesiòn de ra Rapreșentànza de Règola Òuta da Marigo, sèe 'na fré ajità, ma r é șùda polito.

7 de màșo, mèrcui: sesiòn de giunta da res sié e mèșa da daséra fin res diéș.

8 de màșo, șóiba: éi portà su a l'Oșpedà i dói farài e ra Cróș che ón dorà par ra fêșta de Saiàco, éi anche toléș ra meșures de dói breói da béte su ra cejùra del ștradón.

10 de màșo, sàbeda: ancuói dapò dișnà éi fàto un sòuto in Piàn de Lóa, dal Tornichè un șò, a véde se r'èrba școménza a créșe, 'l é ancora tàces de gnée... sòn tornà da òta par S. Ubertus.

11 de màșo, domégna: anche ancuói dapò dișnà sòn moéș, adùna con mè fiól Johannes, via in Valbòna par véde de fei un curadizo da calche bànda intór ra Cașera Vècia, ma i amighe de Claudio de Chéco e de Aldo de Còbe, i aéa bèle che proedù.

13 de màșo, màrtes: da daséra dapò laóro ió e 'l mè secóndo Šenico Luștro, sòn șùde sù a l'Oșpedà a comedà chera cejùra che 'l é sul ștradón che dijée lòutradì, con dói breói e alcuànta vides.

14 de màșo, mèrcui: ancora adùna con Alberto Luștro, secóndo Šenico, ón portà sù a l'Oșpedà, inze Jèja, i dói Sante: Nicolò e Biagio e betùde su l'Altà, un par bànda: S. Biagio a màn zànca e S. Nicolò a màn dréta, a vardà l'Altà.

15 de màșo, șóiba: Portișiòn a l'Oșpedà: da res sète e mèșa da bonóra sèe lasù, piàn, piàn 'l é ruà chi òutre, el mè Šenico, el Marigo de Anbrizòra, el Rișcia, Nilo e 'l sò amigo Cirillo, ón parecià ra ultima ròbes inze Jèja, intanto 'l é ruà anche 'l Pioàn, don Davide Fiocco e vès res òto e un cuàrto sòn moéște in fòra vès Caștèl coi farài e ra Cróș, là 'l èa un grùn de șènte che șpetàa, 'l é ruà i pize da șcòra e da res òto e mèșa iuștes, sòn moéște co ra portișiòn, i doi Marighe de Règola Òuta davànte coi farài, ra Cróș portàda da Claudio de Zan, un de i fiói de Franco, bonanima. Intanto Méșa el Pioàn 'l à dito alcuànta paròles che a fato pensa sóra dute cuànte, dapò Méșa ra Rogaziós, Letàgnes dei Sante e benediziòn de ra canpàgna, tornàde inze Jèja, de poche, ra ultima oraziós e dapò dute a merènda ofèrta da ra dóa Règola Òutes. Da meșodi, dișnà co ra "autoritàs", póches, éi abù da fei anche el mè prin

“dišcorso”, pichesée un gramarzé bén a dute, e un ‘na fré pi gràn al Luštro dapò de duto chel che ‘l fèš par me dià ‘na màn a fèi el Marigo. De alcuànte sòn vanzàde là inze oštaria fin séra a se ra contà, ‘l é štà gràn bèl...

16 de màšo, véndres: éi feni de parecià ra ultima ciàines con i nùmere dai portà ai pàor.

17 de màšo, sàbeda: da res òto da bonóra sòn moéš col sòlito Šenico Luštro e mè fiól Johannes, a fei el širo co ra ciàines par i bešteame da monteà: S. Cašàn, Picolin, Longega e S. Lorenzo, agnóche, inze ra sòlita oštaria da Traube, me špetàa alcuànte pàor, i éi consegnà ra ultima ciàines e là ón fato ra sòlita beberèla ofèrta da ra Règola Òuta, là éi ciapà ancora 14 ciàe, éi abù un gràn contènto. El prin Šenico Diorništa no n’èa, gòuja che ‘l é šù in pelegrinàjo a Santiago de Compostèla, el štà via zinche setemànes...

18 de màšo, domégna: S. Créšema, el tènpo ‘l èa da guèrgno e coši no n’è štà gnànche fato ra Portišión con i Confarói, Mesa Grànda col Vešcovo e Créšema a 50 pize, dapò Mesa beberèla inze ra sàles de ra Calònega.

19 de màšo, lùnes: adùna col Luštro e Guido Diorništa sòn šùde sul pòšto in Antrùiles a véde par el curadizo de sàbeda ai 24 de màšo, ma ignànte ón fàto un sòuto fin a Ra Štua a se tuói i atréze che i èa štàde betùde d’autón sóra ra štàla, inze chera sòrte de toulà, dapò de l’ultimo curadizo.

21 de màšo, mèrcui: éi portà šò i dói Sante da l’Ošpedà con Johannes e portàde inze Jeja. Da daséra sesión de giunta da res sié e mèša fin res diéš.

22 de màšo, šóiba: Corpus Domini: ‘l èa guèrgno e no s’à podù fei ra portišión, Méša Granda, no n’èa el Marigo de Anbrizòra, ‘l èa el sò prin Šenico Marco Ghedina Tomàš.

23 de màšo, véndres: éi proedù, adùna co ra mè femena, Maria Teresa, ra merènda par el curadizo de domàn. Da daséra con Alberto e Marco Luštro sòn šùde in Antrùiles a šcomenzà ‘l curadizo, pi tarde ‘l é ruà inze anche Sergio, el paštór de ra fédes, a me dià ‘na màn... ai!?!... Špaghetàda al canpégio de Fiàmes, ofèrta da mi, Fiorenzo León.

24 de màšo, sàbeda: curadizo in Antrùiles: póco ignànte res òto da bonóra dute a S. Ubertus e dapò inze in Antrùiles, ra šornàda no n’èa de res mèò ma ‘l no n’à pioéš. Con dói tratóre e ‘l fiól de Elsa de Zardin(Soriza) con chera machina da ciarià, ón šcomenzà alòlo a ingrumà chel che aeón roesà ra sera ignànte. I dói Luštre: Alberto e Marco co ra motosies i é šùde inavànte a taià e a roesà pedalís dal cašón in sù e chi òutre ingrumàa e reštelàa insième. Da res diéš merènda con un gràn bèl parécio, Mauro Ménego e Walter Filèno aéa parecià duto in ordin. Dapò de ‘na fré de pòusa

dùte danóo a lourà fin un'ora e mèşa e pò dute a dišnà. Intànto 'l èa ruà anche 'l paštór da ra fédes, Sergio con Caterina, sun tòura 'l èa el ben de Dio, da magnà e da bée, dóa paròles de gramarzé bén da parte méa, intànto 'l é vegnù ora de ši a feni chel poco che 'l èa vanzà da šturtà sù. Vès res undeš 'l èa ruà anche chi da ra televižión, i ruàa da Lariéto, anche là i à fàto curadizo, 'l èa Stefano de ra Becaria, sacretàrio de ra Règoles, i m'à anche intervištà, come Marigo, pa ra trašmišión "Gheo en Gheo", i voréa saé cemòdo che 's và inavànte ra nòštra Règoles, con un grùn de šènte che laóra par de bàn e zénza interèso de parsóna. A ra fin són beù ancóra calche gòto e ón fato ancora 'na fré de merènda, ón menà i atréze inze a Ra Štua e pò dute al Bob Bar a se bée ancóra calche bira. 'L é štà 'na gràn bèla šornàda pasàda adùna de vintezinche parsónes, regoliére e nò regoliére, con gràn vóia de lourà e de fei algo pa ra nòštra Règoles. Gramarzé bén a dute cuànte.

28 de màšo, mèrcui: sesión de giunta da res sié e mèşa, pi tarde sesión de deputaziòn fin res undeš e un cuàrto.

4 de šùgno, mèrcui: són šù in Piàn de Lóa sul pòšto a véde se r'èrba r'é crešùda par podé monteà, éi telefonà ai pàor par monteà lùnes ai 9 de šùgno e parecià par chešto.

5 de šùgno, šóiba: ancuói alòlo bonóra són šù via a Picolin in Val Badia, a portà alcuànta ciàines a Videsot, gòuja che m'aée falà con i nùmere. Da res undeš són šù su a l'Ošpedà gòuja che 'l é vegnù chi de ra Rai 3 Ladina a tuói šò ra Jeja de S. Nicolò e r'oštaria de l'Ošpedà, i à vorù saé 'na fré ra štòria de ra Règola Òuta de Lariéto, dei Marighe, de ra Jéja de San Nicolò e de ra Règoles. Dapò dišnà in Regola a šcotà l'avocato Trebeschi par alcuànta ròbes, contràte e ràdeghe che à ra Règoles con regoliére.

7 de šùgno, sàbeda: són šù in Piàn de Lóa a portà un fiór su ra Cròš che 'l é la inze l'albèrgo pède cašón, par monteà lùnes.

8 de šùgno, domégna: són šù in Piàn de Lóa a comedà ra ciadéna che 'l é su ra štànja sul pònte su ra Boite par sarà via che no šcanpe i bešteàme.

9 de šùgno, lùnes: éi monteà in Piàn de Lóa: da res nòe 'l é ruà Anjelo Bròco con dói torèle, bòs, vès res diéš Mario Ròco (Baštél) 'l é šù fòra a Fiàmes a tuói el Prèe, don Giovanni Maria Belli e da res undeš 'l à benedi ra mόνte e i bešteàme, "solo chi del Bròco", 'na fré de merènda cemòdo che se uša e sul mešodi 'l é ruà i prime forèšte da ra Val Badia. Con mé 'l èa; Alberto Luštò, Mario Ròco, el paštór Umberto Lucabèca e dói guardiabošche, da res tré e mèşa 'l é ruà i ultime bešteàme forèšte e da res cuàtro e mèşa sèe a ciàša, da da res òto da bonóra in cà, e manciàa ancora cheres del Partel e del Menegùto.

10 de şùgno, màrtes: šta séra da res sié sòn şù in Piàn de Lóa, gòuja che 'l Menegùto 'l à monteà òutre nóe ciàe.

11 de şùgno, mèrcui: sesión de giunta da res sié e mèşa fin res òto e mèşa.

12 de şùgno, şóiba: anche šta séra éi fato un sòuto in Piàn de Lóa a saludà Marino, el vida.

16 de şùgno, lùnes: 'l é sènpre guèrgno, 'l é doi més che 'l pióe, aprèspóco. Štaséra, col mè secóndo Šenico Luštro, sòn şùde fin a Ra Štua e pò sù in Leróşa a véde se r'èrba r'é creşùda... póco... no se pó ancora monteà.

18 de şùgno, mèrcui: sòn şù ai dià a Sergio, paštór de ra fédes, ai caà sango a ra fédes su sóra Còl Tóndo, 'l èa cuatro vetrinàrie e una ventina de parsónes, co 'l é štà fenì, dute sù a Miétres a dišnà. Da daséra da res sié e mèşa sesión de giunta fin res nóe.

19 de şùgno, şóiba: šta séra sòn şù in Piàn de Lóa a vardà i bešteàme e dapò a Ra Štua a parlà col paštór par monteà ai 25 de şùgno.

23 de şùgno, lùnes: sòn şù in Piàn de Lóa a portà 'na fré de merènda par domàn da séra.

24 de şùgno, màrtes: da res sié da daséra sòn şù fin a Ra Štua a portà alcuànta ciàines, che Oberhammer ruàa co 'na ciària de bešteàme ancora in chera séra, dapò şò in Piàn de Lóa a ingrumà ra bešties par domàn bonóra. Seón de alcuànte, pède de i doi Šeniche, 'l èa : Anjelo Bròco, el paštór e 'l sò vida Marino, Giordano Nàndo, Manuel Moštàcia, Silvino Mùl e una femena con doi pize, amiga del Bròco. Ón betù un tòco a ingrumàres e saràres via inze un dèdui, i n'èa sù par Còšta dei Sié e sù par Inpó ra Gràes, dapò de s'ae saràdes via ón fato 'na fré de merènda, "ofèrta da mi, Fiorenzo León", dùte adùna e da res diéš ón podù şisin a ciàşa.

25 de şùgno, mèrcui: ancuói éi monteà a Ra Štua; da res zinche dute al Tornichè e dapò şò in Piàn de Lóa, da res zinche e trèntecuàtro ei da el via e sòn moéšte vès Ra Štua col ròdol "51 ciàe", anche ancuói seón de alcuànte, da res sète iùštes seón davànte ra caşèra de Ra Štua. Pi tarde 'l à şconenzà a ruà cheres da ra Pušterìa, da res undeš e un cuàrto 'l é ruà el Pioàn don Davide a benedì ra mónte e i bešteàme, 'na gràn bèla ròba, Umberto 'l aèa parecià da merènda ofèrta da ra Règola Òuta de Lariéto, intór meşodì ón dišnà e ra ultimes s'é ruàdes da res cuàtro e éi podù şimin a ciàşa. El De Boni 'l à menà inze anche òto ciòures, con chères de Rosa de Vico. A ra fin ón un ròdol, zénza ciòures, de zèntovintecuàtro ciàe. 'L é štà 'na gràn bèla şornàda da me recordà par sènpre. Da daséra vorée m'in şi a dromi che sèe štràco mòrto, invénze me telèfona el presidènte de ra Règoles, Cinzia de Ugo de Antonia a

me preà de ši a sesiòn de Deputaziòn gòuja che i no n'èa de asèi par šcomenzà e coši m'à tocià mòe fin res dièš e un cuàrto.

26 de şùgno, şóiba: ancuói 'l é ruà alcuànte cavài e šta séra ei fato un sòuto danóo fin a Ra Štua ai da 'na ociàda, i n'é de gràn biéi.

28 de şùgno, sàbeda: dapò dišnà ei fato un sòuto a Ra Štua a véde che 'l é ruà ancóra alcuànte cavài.

29 de şùgno, domégna: adùna con Guido Diornìšta sòn şùde sù in Fòses a portà ra bateries par ra lùmes e ón betù a ši ra pónpa da r'aga, io éi portà sù alcuànte piàte e gòte, s'ón fato algo da magnà e da res dóes e mèşa sòn moéšte in şò. Co seón drio a mòe no špóntelo el Cuiétro, Rinaldo Zachèo... sòn danóo šentà şò a se bée algo e pò sòn moéšte. 'L é pasà un grùn de şènte par Fòses.

30 de şùgno, lùnes: šta séra sòn şù inze a Ra Štua a portà 'na diejina de ciàines che domàn bonóra Oberhammer me mena fòra danóo òto cape. M'èi betù dacòrdo con Giorgio Menegùto par majenà el curadizo de Antruiles, d'autón el se ména via duto?!?... .

1 de lùio, màrtes: dapò laóro sòn şu danóo a Ra Štua a me tuói ra cartes de ra ultima beštiés che 'l é ruà da bonóra, òto ciàe menàde da Bornéco dal sòlito Oberhamer, 'l à dito che 'l èa ra ultimes e sòn ruà a zèntotrèntadóes, no n'é mal... sòn gràn contènto.

2 de lùio, mèrcui: ancuói bonóra éi ciapà 'na telefonàda da Picolin, da Videsot, 'l aéa ancóra un cavàl e dói puliére da monteà, el me domandàa se 'l èa ancora pòšto, no n'èi podù di de nò.

3 de lùio, şóiba: 'l é ruà i tré cavài de Videsot, e dapò meşodì ón menà ra fédes in Antruiles co ra sòlita merènda.

5 de lùio, sàbeda: ancuói ón monteà ra fédes in Fòses: da res sète manco un cuàrto, adùna con Mario Ròco (Baštel), sèe davànte caşon de Antruiles, piàn, piàn 'l é ruà òutra şènte e 'l paštór con Caterina, ón curà fòra i agnéi pi pize e betùde inze casón del tratór de Guido Diornìšta e da res sète e vintenóe Sergio paštór 'l à da 'l via e sòn moéšte. Ra şornàda r'é štàda de ra pi bèles, un viàşo gràn bèl, fòra a S. Ubertus, Ra Štua, Cianpo de Cróš, Val Salàta fin a Ra Òta del Baràncio che sòn ruàde vès res dièš, s'ón ciarià dute cuànte come mùš e via fin in Fòses. El mè Šenico Luštro 'l à menà sù 'l prèe don Giovanni par ra benediziòn de ra mónte e de ra fédes, intànto ón fato merènda e 'l é ruà anche el ròdol, una ròba da preşèpio inze, 'l Paradis de Fòses. Intór meşodi ra funziòn relijóşa co ra sò oraziós, benediziòn de ra mónte e dei bešteàme, dóa paròles del presidente de Anpézo Oasi, Paolo Agnèl e del Cuiétro Rinaldo Zachèo. Ei da di che i n'èa pi de un co ra làgremes in zi òce... Sòn štàde là

ancóra a se ra contà par un tòco, el Luštro 'l à menà sò 'l Prèe e nòs de alcuànte sòn sùde fin via in Senes a se magnà un ònblet e a se bée 'na bira...!? Pi tarde sòn moèšte par Fodara a se magnà ancora algo e da res dièš seón a Ra Štua, Paolo Agnèl m' à menà fin al Sas Šendù agnóche aée lašà r'automòbile. Monteà ra fédes, menàres sù i Fòses, 'l é sènpre 'na ròba che me tocia el cuóre e špéro de podé monteà ancóra par tante ane.

7 de lùio, lùnes: ancuói dapòdišnà aée da ši sù a Sorabances ai dià a Alessia Péta a menà su par Gotres i sò cuàtro cavài che i aéa da ruà da Bornéco, ma gòuja el tènpo de ra séra ignànte el no n' à podù menài fòra.

8 de lùio, màrtes: šta séra dapò laóro sòn sù fin a Ra Štua a me tuói ra cartes dei ultime tré cavài che 'l éa ruà šóiba, chi de Videsot.

9 de lùio, mèrcui: da daséra sesión de giùnta, da res sié e mèša fin res dièš.

10 de lùio, šóiba: dapò laóro sòn pasà in Regola a me béte dacòrdo gòuja chera štànjes che ra Regoles a da me dà par ra cejùra intór el cašón de Fòses, pi tarde sòn sù fin a Ra Štua ai portà duta ra cartes dei bešteàme monteàde, de chel vèr éi ciatà el guardiaparco Giorgio Zangiacomi Zachè, (Zachi) e m' éi betù dacòrdo par i dà fó a chel grùn de légnés del curadizo de l' anpasà d' autón.

11 de lùio, véndres: štasera dapò laóro sòn sù, adùna con: Marco Luštro, sò šarmàn Alberto, mè secóndo Šenico, e 'l guardiaparco Giorgio Zachè Zachi, inze a Ra Štua ai dà fó a chel grùn de légnés del curadizo de l' anpasà d' autón; da res sète e òto menùte i ón da fó al pèzo, con 'na fré de benšina, inz' un cenoéde 'l éa un fó come da ra Madòna de agóšto. Sòn štàde pède 'na bòna ora e pò sin sòn sùde fin su in Senes a se magnà algo, el Zachi si n' é sù a ciàša. Canche sòn tornàde da òta, ón šturtà 'na fré insiéme i tòche pi gròš che no s' aéa brujà. 'Na ròba curióša; 'na cuindejina de arméntes, pichesée vedèles, no n' èa el cajo de res parà via dal fó, una ròba da no créde, 'l éa inze anche 'na cóa de uziéi, Parùšcoles, Cinciallegra, (Parus major) intrà i rame. Ei fàto alcuànta fotografies par recòrdo. Da res dièš e meša seón a ciàša.

12 de lùio, sàbeda: ancuói bonóra ignànte res sète sèe a Ra Štua a šturtà adùna chel che 'l éa vanzà del fó de anséra, s' aéa brujà debòto dùto, 'l éa 'na fré de ròba gròsa, ei fato un grùn e 'l à ciapà alòlo, intanto 'l é pasà Umberto a m' invidà a bée cafè e da res òto e mèša pasàdes sèe danóo a ciàša, co 'na gràn pùza da fun intorno.

15 de lùio, màrtes: ancuói ignànte mešodì éi širà tré ores par Cortina gòuja un cònto de ra Sozietà che no me comodà; alòlo bonóra inze i ufizie de ra Sozietà, dapò fòra a Piàn da Lago a parlà col mè secóndo Šenico Luštro, dapò danóo a ra Sozietà e dapò a ra Casa Rurale a pagà el cònto, šta òta iušto. I s' aéa falà con un buòno de

špésa, fato dóa òtes. Domàn bonóra m'in vado una setemàna a špàso con ra mè fémèna.

23 de lùio, mèrcui: ancuói bonóra sòn šù in Regola a me fei fèi un parmésò par ši a Ra Štua par un pàor de Bornéco, dapò sòn šù fin fòra a Piàn da Lago a saludà el mè secóndo Šenìco Luštro e ai portà dóa bòzes de vin de chel bón... dapò sòn šù in štànparìa a fei fèi i placàte par el konzèrto del Coro Cortina de i dói de agóšto. Dapò dišnà 'l é vegnù Andrea Diornìšta, prin Šenìco, a si tuói par fei béte el tinbro, vès séra éi fàto un sòuto fin a Ra Štua ai portà el parmésò al paštór par chera fémèna, a tornà da òta éi fato un sòuto fin via a l'Ošpedà par parlà con chi de r'oštaria, sènpre gòuja el konzèrto, ma no n'èa negùn, me tociarà tornà...

24 de lùio, šóiba: šta séra da res sié e diěš m'à ciamà Ida de l'Ošpedà par me domandà se saée che šta séra 'l èa Mesa par i benefatóre?!?... io no saée nùia... éi ciamà el Luštro, che no m'à rešpondù, el Diornìšta, che 'l no n'à podù gòuja che 'l èa inze ufizio de ra guìdes. Da res sié e mèša sèe a l'Ošpedà, el Prèe che me špetàa, éi sonà Méša e pò éi menà don Giovanni sul Altà, no saée nùia de šta ròbes, el Šenìco no m'à mai dito nùia a što riguàrdo, dapò Mesa éi šturtà via dùto, éi sarà ra Jéja e sòn šù su inze oštaria a me béa algo con chi póche che 'l èa a Mesa: el Menego, el Bechin, el Bèta, chi òutre dute forèšte...! No n'èa negùn de ra Règoles...

29 de lùio, màrtes: dapò mešodì sòn šù fin a Ra Òta del Baràncio a véde se ra Règoles aèa portà sù ra štànjes pa ra cejùra intór cašón de Fòses, no n'èa nùia! Donca sòn šù fin via in Fòses a saludà Sergio e Caterina, Sergio no n'èa, 'l èa solo Caterina che fajèa dèdui pa ra fédes con i agnéi pize, i éi dià 'na màn e pò ra m'à ofèrto da merènda e un bón gòto de vin. Inze un cenoéde 'l é vegnù ra pióa e éi abù da šcanpà in preša. Canche sòn ruà a ciaša 'l à telefonà ra Règoles a me di che domàn i menàa sù ra štanjes.

30 de lùio, mèrcui: da daséra sesión de giunta da res sié e mèša fin res nòe e mèša.

2 de agóšto, sàbeda: Konzèrto del Coro Cortina; da res sète e mèša sèe a l'Ošpedà agnóche me špetàa el mè prin Šenìco Andrea Diornìšta, ra Jéja r'èa debòto pareciàda, ón portà alcuànta caréghes de l'Ošpedà, 'na fré tardio 'l é ruà anche el mè secóndo Šenìco Luštro, co ra mótoicléta?!?... e chéra dóa fémènes che tòl sù i donatìe davànte pòrta de Jéja, Tatiana de Marcelo de Chile e sò sorèla?... i cantóre intànto i proàa e da res nòe e un cuàrto iuštes i é vegnùde fòra de Sacreštìa e i s'à betù davànte l'Altà prònte par ciantà. Ió, Marigo, i ei dà el bón azèto al Coro Cortina e a dùta ra šènte che 'l èa a šcotà. Una nòta 'na fré sièšta; inze 'l šcàign davànte 'l aèa da èse anche el Marigo de Anbrizòra, ma pòšto che 'l ciantàa, 'l éi invidà a fèi anche el Marigo e 'l éi ciamà pède mé par el saludà e i dà el bón azèto, coši 'l à contà una de ra sóes, da "agnèl", ...che par cajo štó an s'à ciatà a fèi i Marighe de ra dóa Règola Òutes, un Agnèl e un León... El konzèrto 'l à durà fin res undeš, con tré "bis", gràn bèl e gràn bràe. Ón šturtà sù ra Jéja e dapò dute sù inze

oštaria par 'na "špaghetàda" ofèrta da ra Règola Òta de Lariéto, i à fato ancóra dóo tré ciantàdes e da un óra s'in són vegnúde in şò a ciàşa. 'L é štà 'na gràn bèla seràda col Coro Cortina.

3 de agóšto, domégna: dapò meşodi, adùna col Šenico Alberto Luštro, són şùde sù co r'automòbile fin a Ra Òta del Baraàncio a véde ra štànjes de ra cejùra e pò via in Fòses a véde el laóro e a saludà 'l paštór e Caterina e a parecià 'na frè el laóro de sàbeda che vién, par menà via ra ròba con l'elicòtero. Un sòuto fin in Senes e pò a ciàşa.

4 de agóšto, lùnes: ancuói bonóra in Règola a fei mandà i invite a duta ra Rapresentàntza par fei ra cejura, dapò sù in Val da Bèpe Mèlo a me tuói ra fareàda de ra pòrta de caşón, dapò in Casa Rurale a fei doo tré operaziós de banca; libréte, i sòde del conzèrto de l'Oşpedà e pagà a ra Comunàntza chel che vanzàa de l'afito de Ra Štua (chel che 'l mè secóndo Šenico Luštro no n'aéa pagà!!!...) intanto 'l à ciamà l'elicòtero par menà via ra ròba.

6 de agóšto, mèrcui: no són štà bón de parlà con Sergio par telèfono, donca dapò dišnà éi ciapà e són moéş su in Fòses, m'èi ciarià inze alcuànte atréze: lèes, màes, badis, sapón e manarin e són moéş. In Fòses no n'èa negùn, solo i muş... éi şpetà fin res zinche e pò són moéş par tornàmin a ciàşa, un tòco in là éi vedù ra fedes vès Ra Òta del Baràncio ogàdes vès Fòses e 'l paštór sù in són che m'aéa vedù. Canche 'l éi incontrà éi podù me béte dacòrdo par şóiba gòuja l'elicòtero. Da res sié e mèşa sèe a ciàşa.

7 de agóšto, şóiba: ignànte meşodi fòra a Piàn da Lago a parlà col mè secóndo Šenico Luštro, par dapò meşodi. Da res dóes e mèşa 'l é ruà Marco Luštro a me tuói, co ra vaşca da menà sù in Fòses, al Tornichè 'l èa chelòtro Luštro, Alberto, con Mario Ròco e 'l mecànico del elicòtero che me şpetàa, són moéşte vès Ra Òta del Baràncio, là ón parecià ra ròba da menà via, dapò 'l à ciamà l'elicòtero e con cuàtro viàşe 'l èa dùto in Fòses pède caşón, vanzàon noşòutre zinche, i à tanto fato par me fei montà sun chel uşorón, che éi zedù e són montà su anche io, aéé 'na paùra del demògno e són moéşte, io davànte col pilòta (come Marigo) inze póche secónde seón sóra el Lago, 'na merevéa...! Són deşmontàde dute cuàtro e 'l si n'é şù. M'à sapù gràn bèl, no n'aràe mai cardù de montà inze un de chi afàre là. On şcomenzà alòlo a fei algo: sià fòra i tólpe e i fei ra pónta, on tirà su ra cejura vècia e şcomenzà a bete şò i tólpe nóe, Sergio m'à parecià da merènda e pò ón fato ancóra algo, ón betù via i atréze e són beù ancora algo (parapampoli) dapò res sié són moéşte vès ra Óta del Baràncio e ón fato un sòuto fin via in Senes a se magnà un ònblet e a se bée algo... no se pó pasà 'l confin zénza pasà par Senes, da res diéş e mèşa seón a ciàşa. 'L é štà una gràn bèla şornàda.

9 de agóšto, sàbeda: ancuói, infinalménte, ón fato ra cejùra intór caşón su in Fòses. Da res sète da bonóra al Tornichè con tré automòbiles fin a Ra Štua, una r'ón laşàda

là, chera de Giorgio Mèrša, da res òto e dièš seón sul pòsto de dódeš, ón šcomenzà alòlo a lourà, de cuàtro con Guido Diorništa a béte sóte el pozéto, 'na sòrte de feštìnèl, de ra pónpa da r'aga, chi òutre drìo ra cejùra, da res nóe e mèša 'l é ruà Marco Luštro con òutre tré òme, ón lourà dute come muš, vès res dièš i éi ciamàde a merènda e calchedùn, zénza féi gnòmes, Diorništa, m'à anche rešpondù malaménte...! In dut'i caje dapò merènda, sòn šùde inavànte col laóro fin res dóes e ra cejùra r'èa prònta, sòn šùde adóra, con chel che 'l èa vanzà, a fei anche un pedàign (passerella) fòra inze chel parù agnóche pasa el tróì. Intànto 'l paštór e Caterina i aéa parecià da dišnà, agnèl, polènta e 'na zàina (quantità) de conpanàšego de ògni sòrte e vin. Ón magnà e beù fin séra, ciantà, col Filèno che sonàa el fòl, dapò sòn toléš alcuànte atréze e sòn moéšte vès Ra Òta del Baràncio e pò via in Senes, da là de alcuànte s'in'è šùde a ciàša con Marco Luštro, nošòutre ón fàto res undeš e pò s'ón inventà de ši šò al Plàn, là 'lèa 'na fèšta e ón štà là fin res dóes e pò danóo fòra par i Tamerš, Pederù, Fodara Vedla, Senes e Ra Štua e da res tré seón a ciàša štràche mòrte e zénza óš... aée invidà anche Nicoletta, una toša da Venezia che s'à inamorà de Fòses, r'à lourà come dute chi òutre anche era...

10 de agòšto, domégna: alòlo bonóra sòn moéš in Fòses, sòn pasà dal Tinele a tuói un bechin de pan fréšco dai portà su a chi dói, aée da ši a me tuói chel che aée lašà lasù agnére, da res òto e mèša sèe là, Caterina m'à fàto cafè, Sergio 'l èa šu a menà šò ra fédes da ra Cròda Rósa, agnóche š'aéa dromì. A tornà da òta éi fermà a Ra Štua a me tuói ra cartes de chi ultime cavài (Pòni) che aéa menà el Menegùto, da res dièš mánco un cuàrto sèe a ciàša.

11 de agòšto, lùnes: ancuói sòn pasà in Règola par alcuànte afàre e par fei féi el bréto de Leróša che 'l é marzo, sòn pasà inze ufizio del Agnèl (architetto) a firmà alcuànta cartes dei projète de l'Ošpedà e dapò fòra a Piàn da Lago a parlà col mè secóndo Šenìco Luštro.

13 de agòšto, mèrcui: dapò mešodi, adùna con mè fiól Johannes, sòn šù fin a Ra Štua e pò sù in Lerósa, ignànte dùto a saludà Marino e pò a vardà chi tré brénte che 'l é sù de là, chel pède cašón che 'l é bišòign de canbiàlo, dapò inze a Tre Monti, chel 'l é bišòign del béte a pòsto, dapò in Ciànpo dei Toulàs, anche chel 'l é duto štòrto, un di o l'òutro širèi ai comedà con calchedùn che mé dà 'na màn. A ši in šò vès Ra Štua ón ciatà alcuànta fónjes, lašò éi parlà 'na fré col paštór e da res zinche pasàdes seón a ciàša. Da daséra 'l é vegnù Guido Diorništa a me portà un màì che 'l èa vanzà intórno sàbeda pasà..!?!.

15 de agòšto, véndres: ancuói, cemòdo che se uša da sècui, el Marigo i pòrta ra merènda al paštór, ió sòn šù su in Leróša ai portà ra merènda a Marino. Vès res nóe 'l é vegnù a me tuói el mè secóndo Šenìco Luštro, sòn šùde a tuói Silvino Mul, e pò inze a Ra Štua agnóche me špetàa Giorgio Mèrša, sòn moéšte in sù fin inze 'l piàn e pò a pè, el tènpo no n'èa pròpio gràn bèl, o mèò, el pioéa, lasù no n'èa negùn...!?! E ši che 'l aée avišà dói di ignànte. Sòn trnàde šò a Ra Štua e sòn moéšte vès Fòses

agnóche el Cuiétro, Guido Diorništa, i portàa ra merènda al paštór de ra fédes, ('l aràe abù da èse Rinaldo Zachèo a portà ra merènda al paštór, ma gòuja che 'l à zavàrie a ciàşa con sò fia maràda, 'l é Guido che fèš da Cuiétro). A Ra Òta del Baràncio sòn ciarià dói fiašche de vin del paštór e sòn moéšte par Fòses, el pioéa che Dio ra mandàa. Un tòco in là ón incontrà Guido che tornàa da òta a tuói ancóra òutra ròba. In Fòses 'l èa Marco Luštro, Sergio, Caterina, Renato (Nato) e cuàtro toşàte, un, fiól de Sergio. Ón fàto 'na fré de tetòia davànte caşón, gòuja che 'l pioéa. Ón magnà e beù dute cuànte adùna, Caterina ra m' à sonà anche algo col fòl, Guido 'l à dito dóa bèla paròles al paštór, ...che unòtro an el tórne in Fòses... Co 'l é štà dinultima seón de dódeš, a contà anche un veneziàn che s' aéa fermà là gòuja ra pióa. Pi tàrde sòn moéšte dute, noşòutre, vès Ra Òta del Baràncio e pò via in Senes ai fei i augùre a Cecilia (Cila) che agnére 'l èa el di del sò natalizio. Vès séra sòn şùde şò a Fodara a se magnà algo e là ci one ciatà?... El veneziàn, che ştajéa là de alòšo in vacàntza, là r'ón menàda ancora 'na fré e pò s' in sòn vegnúde in şò e da res undèš seón a ciàşa. 'L é štà una gràn bèla şornàda e 'l é 'na gràn bèla uşàntza chera de ra merènda ai paštóre, şto an m' à tocià a mi e m' à sapù gràn bèl, anche sote ra pióa...

19 de agóšto, mårtes: ancuói bonóra sòn moéš a Ra Štua co r'automòbile, éi saludà el paštór e pò su in Leróşa a saludà Marino, che no n'èa?!? ... inze vès Piàn de Socròda, trói şero, Rémeda Róses e Fòses a saludà el paštór, che no n'èa... 'na fré dapò 'l é ruà Caterina co ra fédes da Rémeda Róses. Là m' éi fermà fin res dóes e pò sòn moéš vès Ra Štua par el Caštèl de Fòses, no sèe mai pasà da chera bànda, un bèl sito, da res tré e mèşa sèe a ciàşa.

21 de agóšto, şóiba: ancuói bonóra sòn pasà in Règola e pò in Casa Rurale a deşbrigà alcuànta ròbes. Da daséra Méša a l'Oşpedà par i benefatóre da res sié e mèşa, šta òta 'l èa alcuànta şènte de pi; dute dói i mè Šeniche Andrea Diorništa e Alberto Luštro, 'l èa anche el Cuiétro Rinaldo Zachèo, el Luštro 'l aéa menà su anche dói chirichéte a reşpònde Méša, el sò pizo e un neódo de Siro Titòto, i éi dà anche ra bònàmàn. Ei podù parlà anche par sàbeda par comedà chi doi brénte su par Leróşa, da res òto sèe a ciàşa, io...

22 de agóšto, véndres: da daséra dapò laóro, adùna col mè secóndo Šenico Luštro, mè fiól Johannes e Silvino Mul, sòn şude sù in Fòses a portà ra ròba da magnà par domàn che şón a comedà i brénte sù par Leróşa, ma ignànte Ra Òta del Baràncio ón incontrà el paštór che che vegnia in cà, dónca sòn şude via in Senes a se bée algo con el, Sergio 'l à bù da copà anche un agnèl che s' aéa fàto màl, da res diéš seón a ciàşa.

23 de agóšto, sàbeda: sèe dacòrdo col mè secóndo Šenico Luštro de se ciatà da res nóe e un cuàrto al Tornichè par comedà chi dói brénte su pa ra mόνte de Leróşa, ma i é ruàde dapò res diéš. 'l èa mèšo guèrgno ma sòn moéšte, ió, mè fiól Johannes, Alberto e sò şarmàn Marco, su par ştràda 'l à şcomenzà a pióe ma sòn şude inavànte e sòn ruàde a Tre Monti, calchedùn aéa "comedà" el brénte... Giordano Nando e el

vida, (P. S. són vegnù a saé che Giordano Nando no n'a nuia in consortia col brénto de Tre Monti) i à fato solo dån... intànto che louraón 'l à šcomenzà a pióe sènpre de pi ma no són fermà, seón inze 'l pantàn dai šenóie in šò, 'l à fato tré šguàze un drio l'òutro e dapò un ora e mèša aón betù a pòšto brénto e sarèla, són šcanpàde inze automòbile del Luštro bagnàde come fòra de brénto. Són moéšte in šò vès Ra Štua e pò inze vès Fòses, ruàde sul confìn, invénze de ši a màn dréta són šùde a màn zànca e són ruàde in Senes a se bée alcuànta bires, dapò res dóes són šùde in là vès Ra Òta del Baràncio. Canche són ruàde là 'l à šcomenzà danóo a pióe e a tanpeštà, són ruàde via in Fòses danóo bagnàde come pitòte, són canbià 'na fré, intanto Sergio 'l aéa parecià polènta da dišnà, lóre i aéa bèle che magnà, dapò on magnà e beù anche nosòutre, 'na fré dapò 'l é ruà dói veneziàne sóte ra pióa, i ón dà el bón azèto e 'l à dito che 'l se ciamà Alverà de cašàl, de chi del Ventejèlo e che i sò vèce i èa šùde šò par Venezia šà tànte ane. Caterina r'à tirà fòra el fòl e inavànte a ciantà e a bée "parapampoli"... Vès séra són moéšte in là e són ruàde danó in Senes, là ón danóo beù no sei gnànche cuànto, infinalménte intor res diéš són moéšte in šò e da re undeš sèe a ciàša, io... S'ón pasà 'na gràn bèla šornàda in compagnia, adùna col paštór, Caterina e doi sò amighe, ón fàto 'na gràn fadia, nò solo a lourà, ma 'l é štà gràn bèl.

25 de agóšto, lùnes: són pasà in Règola par me tuói cartes ma el Lète no n'èa, dapò a Piàn da Lago in Casa Rurale a pagà alcuànte conte.

26 de agóšto, màrtes: ancuói bonóra son šù a fenì el laóro de sàbeda pasà, gòuja che 'l pioéa màsa. Da res diéš manco un cuàrto sèe su a Tre Monti, éi comedà ra sarèla del brénto e pò són šù in sù vès Piàn de Socròda e éi ciapà el trói šèro e són šù fin inze in Fòses, là éi magnà col paštór e Caterina e òutra šènte, 'l é pasà anche el Marigo de Anbrizòra Luciano Agnèl con alcuànta šènte, i vegnia dal širo de ra Cròda Rósa, són vegnù in šò par e Caštèl de Fòses. Da res sié e mèša sèe a ciàša.

27 de Agóšto, mèrcui: sesión de giunta da res sié e mèša fin res diéš e mèša.

28 de agóšto, šóiba: són šù in Règola a fei mandà via i invite par ra sesión de Raprešentànza de Règola Òuta, che fajón in Valbòna inze Cašèra Vècia, là da Claudio de Chéco, de šóiba ai cuàtro de setènbre.

1 de setènbre, lùnes: són pasà in Règola par alcuànta cartes e éi ciatà anche el mè prin Šenico Diorništa e ón vardà fòra 'na fré el libro dei verbàles, chel vècio, gòuja el lašito del Valleffero, ma no n'ón ciatà nuia.

2 de setènbre, màrtes: són šù a proéde ra ròba da magnà par ra sesión de Raprešentànza e éi parlà col mè secóndo Šenico Luštro. M'à anche telefonà da Bornéco ra Moro che ra voràe vegni a se tuói i sò doi cavài, o sàbeda o domégna che vién.

4 de setènbre, șóiba: sesi3n de Rapreșentànza de Règola Òuta f3ra del s3lito in Valb3na, da Claudio de Ch3co; da res s3te e un cuàrto s'3n ciatà de alcuànte là da ra pișta da bob e da res s3te e m3șa s3n mo3ște, i3 3i menà via el mè sec3ndo Šenico Luștro, da res 3to se3n là de alcuànte, 3n ŝpetà un bèl t3co che ruàse chi 3ltre par darș3nșe el numero par l3je e co 'l 3 štà dinultima se3n de cuat3rdeș e no n'3i podù ŝcomenzà ra sesi3n. El Diornișta me r'à tacàda g3uja che no n'3e chel el lu3 de 'na sesi3n de Rapreșentànza e che ra no podaràe var3e anche se sea3n dute vintecuàtro. (el Laudo no diș nùia a ŝto riguàrdo, se 'l 3 da ra fei in Ciàșa de ra Règoles o inz'un 3ltre lu3), in dut'i caje 3n parlà 'na fr3 de chel che 'l 3a al ordin del di, piches3e pa ra "F3șta de ra M3nte de Valb3na" che far3n ai vint3to de setènbre. Dap3 sesi3n s'3n fato 'na paștașiuta dute adùna e s'3n beù 'na g3ta de vin e 'l 3 štà gràn bèl anche se calchedùn s'à lagnà che no 'n 3a ch3l el lu3 da fei 'na sesi3n de Rapreșentànza. Da m3șanote pasàdes se3n a ciàșa.

5 de setènbre, v3ndres: ancu3i 3i ŝcomenzà a ciamà cà e là pa ra F3șta de Valb3na: chi che s3na, e Ezio Šmàlzo par fei da magnà.

6 de setènbre, sàbeda: da res n3e e m3șa s3n mo3ș a Ra Štua g3uja che a3a da vegni dootré pàor a se tu3i i cavài. Al3lo dap3 res di3ș s3e sù a Ler3șa, sù par Tr3 Monti 'l 3a 'na ventina de cavài adùna e alcuànta arm3ntes, s3n ŝù in sù piàn, piàn e finche ŝpetàe che i ruàse 3i ŝcomenzà a curà sù saș, pi in sù te vàs e pi gh'in 3, sù e sù fin deb3to davànte caș3n, i n'3i curà sù 'na maji3ra, intànto 'l 3 ruà anche Giordano Nando, (el vida no n'3a!?!...) el s'à anche 'na fr3 vargognà e 'l m'à dà 'na màn, 3n netà sù un gràn t3co de m3nte. Int3r res undeș 'l 3 ruà chi a se tu3i i cavài e anche ra Faicht ra m'à dito che r'a3a fàto cajo de dute chi saș e che 'l pașt3r 'l aràe ben t3mpo de ŝturta sù 'na fr3... r'a dito 3ra... un t3co dap3 m'in s3n vegnù in ș3 e i 3i ciapàde ș3 par el Piàn de ra Pol3nta, s3n ŝù ș3 con l3re fin a Ra Štua, i s'à menà via si3 cavài, là s'3n beù algo, i m'à pagà ra paștura e da ra m3șa m'in s3n vegnù a ciàșa. Da res zinche sesi3n de Comiș3n Agricultura fin res s3te e m3șa. I m'à dà r'inconb3nza de judicà i la3re de i pize da ŝc3ra, de ogà ra comiș3n par i dà i pr3mie ai pize.

7 de setènbre, dom3gna: ancu3i s3n ŝù a ciatà chi che me dià a z3rne f3ra i la3re de i pize da ŝc3ra de "Ra f3șta del Deșmoteà", 3i ciatà Emilio Bassanin, mè amigo, conoșù da dute in Anp3zo, dap3 s3n ŝù su da Rosa de Vico ai damandà anche a era par i ŝcite, r'3 štàda gràn cont3nta e ra s'à molà anche 'na làgrema. No pod3n se deșmenteà dei n3ștre v3ce e Rosa no n'3e r'ultima ruàda inze 'l pa3s, riguàrdo al sa3, ad3s m'in manciàa anc3ra una, i 3i damandà a Angela Nita de Claudio bonanima.

9 de setènbre, màrtes: s3n pasà in Règola par conto de ra Comiș3n Agricultura e da das3ra sesi3n de Comiș3n Agricultura da res si3 e m3șa fin res 3to m'ànco di3ș, s3n ŝude a se b3e algo e da res 3to e m3șa dan3o sesi3n de giunta par deșbrigà 'na fr3 de ràdeghe coi louràntes de ra Règoles, fin res di3ș e m3șa. In Comiș3n Agricultura 3i

deština, aduna col mè secóndo Šenico Luštro e Guido Diorništa, de i dà un contribùto a ra Comišión gòuja ra Fèšta del Dešmonteà, dezidaréi cuànto.

10 de setènbre, mèrcui: şornàda piéna, alòlo bonóra in Règola par aé ra ultima nóes da Angela Nita par menà sù a Lago i nõstre vèce regoliére, ma ra no n'èa, sòn şù fòra a Piàn da Lago a parlà col mè secóndo Šenico Luštro gòuja ra fèšta de Valbòna e de ra Fèšta del Dešmonteà de i undeš de otóbne, dapò sù in Alverà a ciatà Ezio Šmälzo se 'l vién via a frişe lugàneghes e 'l rèsto, e 'l no n'èa gnànche chél, dapò inze a r'Enoteca, là dal Pòdar, par ordenà el vin, dapò dišnà sòn vegnù a saé che 'l èa şcanpà şò i muş da Fòses, no sòn ştà bon de parlà par telèfono col paštór Sergio par l'avişà, pi tarde danóo in Règola gòuja r'aga de l'Oşpedà, da daséra da res sié e mèşa sesiòn de giunta e da res òto sesiòn de Deputaziòn fin res diéş e mèşa, feni ra sesiòn, Roberto Lète 'l à ofèrto algo da bée a alcuànte de noşòtre, gòuja che i é ştà creşù ra pàga. Da res undeš e un cuàrto sèe a ciàşa.

11 de setènbre, şóiba: da res diéş e un cuàrto sèe in ştaziòn con Sergio Pištòla, Marigo de Lariéto Bàsa, par menà sù a Lago i nõstre vèce regoliére che à pasà i otànta ane. 'L èa zinche jeep pròntes par ciarià, da res diéş e mèşa pasàdes sòn moéşte vès Lago, io e 'l Pištòla e i guardiés sòn montàde su r'automòbile de ra Règoles, şò a Cianpo me şpetàa Roberto de Nuco, come Vizepresidènte de ra Règoles, sòn fermà 'na fré su ai brites de Fedèra a saludà el paštór, Davide Santer, no sèe mai ştà a Fedèra... co 'l èa res undeš e mèşa seón sóte ra Cròda da Lago, i vèce i èa dute ruàde, 'na fré de pi de cuarànta, sòn beù algo e intanto chi che sonàa i èa bèle che sul laóro; Florio Meşcol, Bortolin Bartòldo e el Pula. Io m'èi şentà sora tòura, aduna col Vizepresidènte, Ugo Bartòldo co ra sò fèmena e alcuànte de òtre, i m'è dà da magnà gràn polito e Ugo m'è contà alcuànta ròbes de ra Règoles, el 'l é ştà presidènte nóe ane e 'l à betù aduna el Parco, m'è sapù gràn bèl şcotàlo e éi inparà algo de nóo. Dapò magnà ón fato alcuànta fotografies dute aduna davànte refujo e dapò se r'ón contàda 'na fré con dute. Ei da di che chešta idèa de ra Règoles de menà dute i ane i nõstre vèce regoliére a se pasà 'na şornàda in compagnia, 'l é ştà 'na gràn bèla idèa, éi vedù duta šta şènte gràn contènte e digo ra verità, m'è vegnù un grópo inze 'l còl a véde şènte che conóšo da anes, ma che no vedée da anes e anòrum, diventàde vèce, con dute i sò zavàrie dei vèce, ma gràn contènte de no èse deşmenteàde da chi pi şóene. Intór res cuàtro, piàn, piàn, sòn moéşte in şò e 'l nõş Vizepresidènte Nuco, e 'l i à saludàde dute cuànte màn màn che i s'in şia, un gràn bèl èştro...! Nos sòn beù ancóra algo là inze oştarìa e pò sòn moéşte in şò, el guàrdia, Pazifico, "Şpidi", m'è menà anche sù a Còl Jarinéi, un gràn bèl sito, gnànche là no n'aée mai ştà. Da res òto el Nuco m'è menà a ciàşa, gòuja che no n'aée r'automòbile. M'èi pasà una gràn bèla şornàda da no me deşmenteà, coi nõstre vèce regoliére, e pos di gramarzé bén a lore. Domàn bonóra m'in vado alcuànte dis a şpàso co ra mè fèmena.

15 de setènbre, lùnes: sòn apéna ruà e da res sié e mèşa 'l é sesiòn de giunta, ... fin res òto e mèşa pasàdes.

16 de setènbre, màrtes: éi štà inze a Ra Štua a parlà col paštór gòuja el dešmonteà dei bešteàme e sòn betù dacòrdo par ŷoiba ai vintezinche de setènbre, éi ciamà dùte i pàor par i fei saé, sòn ŷù anche in Règola a fei béte fòra el placàto inze bachèca, vorée parlà col mè secòndo Šenico ma no 'l éi ciatà.

17 de setènbre, mèrcui: sòn ŷù a Piàn da Lago dóa òtes par parlà col mè secòndo Šenico Luštro e dapò in Règola.

19 de setènbre, véndres: ancuói bonóra 'l é vegnù a se tuói i bešteàme el Campidel da S. Lorenzo e, pòšto che 'l si ména via a pè par Fodara e che 'l Marigo, par ušànta e coštùme el v à ai dià as parà fin su a Fodara Vedla, što an sòn ŷù anche ió. Da res òto sèe a Ra Štua con: Silvino Mul, Mario Ròco, el mè secòndo Šenico Luštro e sà màre.

Da res òto e un cuàrto 'l é ruà el Campidel con sò fiól e una tóša de vijinànta, el paštór ŷ' aéa menàdes là pède ra štàla ra séra ignànte, i à betù i tantèš da fèšta a tré arméntes e da res òto e mèša sòn moéšte vès Ciànpo de Cróš con sète cape, su pa ra štràda de Rudo e da res diéš e zinche seón davànte refùjo de Fodara, el fiól 'l èa ŷù via in Senes a tuói ancora cuàtro bešteàme, intànto sòn magnà e beù algo dùte adùna. Da res undeš lóre i é moéšte co ra sò beštiés e nós sòn beù ancóra algo e sòn moéšte. Fòra in sòn dei piànes vedón alcuànta arméntes che me vegnia cònta... 'l èa chéres che aeón apéna menà sù da Ra Štua... intànto che nos fajaón merènda, ŷ' à ciapà es s' in é tornàdes in fòra, i ŷ' à ciapàdes fòra dal prin tornichè che's ŷia in šò come lánzes...! Nos ón ciapà el Trói del Jendârmo, che no n' aée mài fàto, e da res dódeš e mèša seón a Ra Štua, là sòn beù 'na bira e sòn moéšte vès ciàša, da res dóes sèe a ciàša. Anche ancuói 'l é štà una gràn bèla ŷornàda da Marigo.

20 de setènbre, sàbeda: ancuói 'l é štà el dišnà dei Marighe de ra dóa Règola Òutes, chi pasàde e chi dói de an. 'L é štà Sergio del Vècia a se ra inventà e 'l ghi n' à betù aduna 34 de ra Règola de Anbrizòra e 31 de ra Règola Òuta de Lariéto: da mešodi dùte sù al Faràl, cardée che fosasóne alcuànte de pi, almànco mèše, invénze seón 24 Marighe e 'na došéna de fémenes, in dut' i caje ón magnà, nò màsa politico, e a ra fin alcuànte Marighe ón dito ra noštra pugón su ra Règoles, e 'l é štà deštinà de ŷcrie 'na létra a ra Deputaziòn co ra noštra idées, de deštinà de pi sòde su ra mόνte, de portà 'na fré de pi in pàlma de màn ra mόνtes. Pi tàrde, de alcuànte, ón fato un sòuto inze in Senes a se bée algo e sòn ruàde a Fodara: 'l èa Paolo Partel, Angelo Bròco con ra sò fémena, Alberto Luštro co ra sò fémena, Stefano Bašilio e ió e ra mè fémena, là sòn magnà 'na fré de šmòrn e 'na góta de vin, se r' ón contàda 'na fré e pò sòn moéšte vès ciàša, póco ignànte res nóe e mèša seón a ciàša. 'L à abù 'na gràn bèla idèa Sergio del Vècia, se ciatà adùna i Marighe de ra dóa Règola Òutes de ŷà 20 / 30 ane e podé se ra contà e parlà de ra noštra Règoles, ŷperón de se ciatà danóo unòutro an.

23 de setènbre, màrtes: ancuói bonóra ón parà šò i bešteàme da ra mόνte fin a Ra Štua, da res òto sèe davànte brite de Ra Štua, con alcuànte che me diàa, io e Rinaldo Mariotti (Mul) sòn šùde su par i Tizói Štorte e pò sù pa ra štràda de guèra fin sù dal Caşón dei Cavài, da res nòe seón là, e pò via vès el Porteà de Gótres, ón vedù anche doi jài Grotói, sòn šùde in fòra vès Ciànpo de ra Fontànes, ió da una e Rinaldo fòra par štràda de Gotres, 'l èa 'na merevéa, dinóte 'l aéa šfarišà e 'l èa dùto bèl bianco, no n'ón ciatà bešteàme e sòn tornàde in inze vès Leróša, là 'l èa chi òutre che me špetàa: el paštór, el vida, Giordano Nando, Manuel Moštàcia e Marina Tanps, da là š'ón paràdes in šò e pò ió e Manuel sòn tornàde in sù, Ciànpo dei Toulàs, Piàn de Socròda e pò šò par štràda, un tòco in šò i 'n éi ciatà tré e pò ancóra pi in inze òutres tré che 'l Moštàcia 'l à parà šò, ió sòn šù ancóra in inze e šò fin al Caşón dei Cazadóre, éi šcaazà via e pò éi pasà ra Boite e fòra par el Valón Šcùro, fòra là éi ciatà òutre bešteàme e i éi paràde fin fòra a Ra Štua agnóche 'l èa chi òutre che špetàa e i š'aéa betùdes inze dèdui pède ra štàla, in manciàa cuàtro; dóa vedèles e dóa arméntes, ra dóa arméntes s'è špontàdes dal Valón Šcùro sóles e che s'òutra dóes i s'à paràde šò da sóra el Brite. Vès meşodi 'l é ruà Oberhammer a ciarià ra primes, sòn šùde a dišnà e dapò 'l é ruà chi òutre: el Menegùto, el Videsot e danóo Oberhammer, in duto i à menà via trèntatré bešteàme e da res zinche ei podù m'in vegni a ciàša. El tènpo no n'é štà màsa galantòn, 'l à anche gneegà, un buiròto fiédo, m'èi ciapà 'na inbramida che no sèe pi bón de me šoudà, in dut 'i caje 'l é štà 'na gràn bèla şornàda che no n'aée mai fàto, domàn deşmontearón ancóra alcuànte bešteàme.

24 de setènbre, mèrcui: secóndo di de deşmonteà; ignànte res sète e mèša sèe a Ra Štua, Oberhammer 'l èa bèle che là, ón ciarià e 'l é moěš col prin viàšo, el tènpo 'l èa gràn bèl, 'na fré fiédo ma bèl. Ón abù da špetà fin res diěš che ruàse chi òutre, infàti 'l é ruà un da ra Pušterìa a se tuói el sò cavàl, dirèto in Ciànpo de Cróš, dapò 'l é ruà el Partel, Oberhammer e 'l Menegùto, che 'l s'in'é šù dirèto, gòuja che 'l aéa da špetà masa, ón ciarià ra ultimes de Oberhammer e 'l s'in'é šù, dapò el Partel, che 'l aéa menà inze ancóra una bàla de fén e intànto i ón dà da magnà ai bešteàme inze dèdui, pòšto che š'èa infamentàdes, anche el Partel 'l à ciarià ra ultima sóes e 'l s'in'é šù, a pasà fòra par ra štànja 'l à ciapà inze el tolpo che debòto el se'l menà a ciàša, el faréi comedà. Dapò 'l é tornà 'l Menegùto, 'l à fato tré viàše con tré a ra òta. Dapò dišnà sòn šùde in Ciànpo de Cróš a menà fòra i cavài del Menegùto e chi de Videsot, ma ignànte ón betù inze dèdui chi nòe Poni pize, sènpre del Menegùto, la inze con 'na fré de pàn, i ón betù ra bérna a ùn e s'in sòn vegnùde in fòra come a špàso, ca fòra 'l èa Videsot che me špetàa, finche ruaón fòra 'l èa Alessia Péta che moéa in sù a véde dei sò cuàtro cavài, r'à tanto grà širà sù de là con Giordano e Giorgio (Zachi) ma i no n'à ciatà nùia, pi tarde Zachi 'l é tornà sù a véde vès Ciànpo de ra Fontànes, ma fin cànce io sèe là el no n'èa ancóra tornà da òta. Ón betù i cavài inze dèdui e ciarià chi tré de Videsot, el m'à ofèrto algo da bée a dùte e 'l s'in'é šù, poco ignànte res sié 'l é ruà el Menegùto par 'l ultimo viàšo, ancuói, da res sié éi podù m'in vegni a ciàša.

25 de setènbre, şóiba: ultimo di de deşmoneà; da res òto màncò un cuàrto sèe danóo a Ra Štua e dapò vinte menùte 'l é ruà el Bròco a se tuói i sò doi bòs, 'na fré dapò 'l é ruà el Menegùto a se tuói dói cavài, intànto Alessia Péta r' é ruàda danóo a véde dei sò cuàtro cavài, i é moéšte in su vès Leróşa e un tòco dapò i à telefonà şò che i aéa vedùde şò par Gotres, màncò mal... 'na fré dapò 'l é ruà danóo el Menegùto e el Niderbacher a se tuói i sò nóe ciàe, el Menegùto 'l é şù inavànte e indrio con dói cape a ra òta, da meşodi 'l èa vanzà ancóra doi cavài e i Poni, seón par şì a dišnà, che ruàa in şò da Leróşa Alessia coi sò amighe e i cuàtro cavài, manciàa ancóra ra ciòures. Són şùde a dišnà dùte adùna e dapò són moéšte a véde de šta ciòures, ş'èa sù par i Tizói Štòrte che res vegnia in şò col vida e Marina, piàn, piàn ş'ón paràdes in şò vès Ra Štua e betùdes inze dèdui, che aèon parecià ignànte sul pònte de ra Boite, ş'ón ciariàdes inze caşón de Marco De Boni, che pi tarde 'l é vegnù a se res tuói, infinalménte, da res cuàtro manco diéş, 'l é moéş anche el Menegùto col sò ultimo viàşo, nóe Poni e a Ra Štua no n'è vanzà pi negùn...! 'L èa dùto vóito, nùdo, una paşión, digo ra verità, m'è vegnù un grópo inze 'l còl a vardà ra mόνte zénza pi vita... ió e 'l paştór s'ón dà ra màn gràn contènte che 'l é şù dùto polito, no n'è suzedù nùia de búrto in duto l'istàde, el m'à ofèrto da bée a dùte e da res zinche sèe danóo a ciàşa dapò tré dis pasàse a Ra Štua a deşmoneà, no me'l deşmentearéi pi...!

26 de setènbre, véndres: ignànte meşodi in Règola a deşbrigà calche afàr e dapò in Casa Rurale a béte via ra paştùres dei cavài e a parlà col mè secóndo Šenico Luştro, ma 'l no n'èa. Dapò dišnà són şùde inze a Fiàmes col Luştro e Nicola Šmàlzo, presidènte dei Seştière d'Anpézo, a ciarià tòures e bànces da menà via in Valbòna pa ra "Fèšta de ra mόνte de Valbòna", i aéa anche ciarià ra ròba da bée fòra a Piàn da Lago, ón fermà a tuói el vin e pò sù a Rù de ra Jères (Rio Gère) a ciarià òutra ròba del Šmàlzo. In Valbòna ón deşciarià dùto, són beù algo e s'in són vegnùde in cà. Io són pasà via a Ciadin da Francesca de Radeški a ma féi féi 'na tabèla da béte in Valbòna agnóche se vòlta inze.

27 de setènbre, sàbeda: alòlo bonóra fòra dal Tinele a ordenà el pàn par domàn bonóra, pi tarde ra mè fémena Maria Teresa, ra m'à proedù 'na fré de proviàndes (cibo) da portà in Valbòna, intànto són şù a me proéde ancóra 'na gota de vin, dapò dišnà són şù a me tuói el pàn, éi ciarià dùto inze automòbile e éi menà dùto via in Valbòna, anche ra tabèla che m'aéa parecià Francesca de Radeški.

28 de setènbre, domégna: Fèšta de ra mόνte de Valbòna, da res òto sèe là, daòs de mé 'l é ruà Claudio de Chéco, i mè dói Šeniche, Leo Bociàštòrta, (polènta) Ezio Šmàlzo a frişe con un sò amigo, Cirillo, ón şcomenzà alòlo a parecià, a béte fòra tòures e bànces, e a taià sù da marènda, ón parecià ra tòura de ra "Zéna de Šconfinaménto", parecià da bée e dùto el rèšto. Intànto 'l à şcomenzà a ruà şènte che m'à dià anche 'na màn, da res undeş e meşa 'l é ruà anche el Pioàn don Davide e una màsa de şènte, 'na fré dapò el Pioàn 'l à benedi ra mόνte e i beşteàme e ra fèšta şia inavànte coi sonadóre, 'na fré dapò meşodi 'l èa prónto el magnà e ió come Marigo, éi preşentà a dute, i "òşpiti" da Marebbe vegnùde par ra "Zéna de

Šconfinamento”, i éi špiegà ‘na fré cemodo che r’è gòuja che póche sà de štà ušànzà, éi liéto ra létres de šcùšes, una par anpezàn e una par zivil, i éi dà el bòn azèto a dùte, autoritàs e a chi che laóra e éi recordà che ra ofèrtes fàtes š’è par el Socorso Alpino de Cortina, intànto ruàà ‘na màsa de šènte, da no créde, i é štàde dùte gràn contènte e éi abù paròles de štima da parte de tànta šènte, ma ‘l mèrito no n’è solo mè, ‘l é tanta šènte che laóra par béte adùna una fèšta coši e sarà da comedà algo anche un òutro an. Ra šornàda no podéa èse pi bèla, una serenàda come un làgo e bèl ciòudo. Cànche s’in’è šù ‘l soróio ra šènte ra šcomenzà a s’in ši e sòn vanzàde con chi da Marebbe gràn contènte de ra fèšta fàta anche par lóre, anche cà éi abù paròles de štima da parte sóa, ón ciantà e sonà inze cašèra con Caterina che sonà el fòl, dapò ón šturtà via chel che se podéa e vès sera chi da Marebbe i é moéšte a ciàša e sòn vanzàde de alcuànte, s’ón fato ‘na paštašiuàta e sòn beù ancóra algo dùte adùna e pò s’in sòn vegnùde a ciàša, io... chi alcuànte s’à fermà fòra da Sisto, ió da res òto pasàdes sèe a ciàša, štràco mòrto ma gràn contènto de ra fèšta. ‘L é štà ‘na gràn bèla šornàda, una gràn bèla fèšta e tanta šènte che no cardaón gnànche nosòutre, gramarzé bén a dùte. Domàn m’in vàdo alcuànte dis co ra mè fémena in Toscana a vendemà...

7 de otóbre, màrtes: alòlo bonóra intorno par Cortina a dešbrigà alcuànte afàre de Règola, fòra a Piàn da Lago dal mè secóndo Šenico Luštro a me tuói i sòde che ón šturtà su in Valbòna, manco de lanpasà, e pò a pagà conte, son pasà in Règola gòuja ra votaziós de ra fin del mes e pa ra Portišión de l’Ošpedà, ra Nanda m’à recordà che ‘l é da portà sù anche i doi Sante inze Jéja, m’aée dešmenteà, da mèšodi éi telefonà al mè secondo Šenico Luštro se ‘l podéa mi menà su col sò camion, ma ‘l é pién de laóro. Vès res does son šù inze a Ra Štua a véde se ‘l m’aéa parecià i conte da pagà, el mi pòrta šoiba a l’Ošpedà, da chera son šù fin via a ‘l Ošpedà a véde se ‘l èa duto a pòšto par šoiba. Da daséra adùna con mè fiól Johannes ón portà sù i doi Sante e betùde al sò pòšto sul Altà, ai bete su, canche ei pasà el confin del Coro, s’à betù a sonà l’alàrme, m’aée dešmenteà de ‘l deštacà, alòlo dapò ‘l é ruà Claudio de Ida a béte duto a pòšto, da res sète seón a ciàša.

8 de otóbre, mèrcui: anche ancuói intorno a pagà conte de ra fèšta de Valbòna. Fòra in Casa Rurale e a parlà col mè secondo Šenico Luštro, dapò dišnà su a l’Ošpedà ai dà r’ultima ociàda par domàn, i éi dià a Alberto a béte ra dàša šò par šàra de Jéja e dapò sòn šù fin fòra dal cašèl de ra faràta a véde chi doi guardiabošche che šturtàa su, i à fato un gràn bèl laóro, i éi dià anche a lóre a fei algo, ‘l èa bišòign. Da res sié e mèša sesión de giunta fin res diéš e vinte.

9 de otóbre, šoiba: Portišión de ‘l Ošpedà: da res sète e mèša sèe a l’ Ošpedà con Nilo che se pareciàa ra sò ròba, šta òta ‘l èa solo, manciàa Cirillo, ce segnàl? ‘L à dito che doi dis dapò de Valbòna i ‘l aéa operà de un tumór inz’i budiéi, šperón che ‘l se ra càe, intànto ‘l é ruà el mè prin Šenico Diorništa che ‘l é moéš alòlo in fòra a pè fin fòra in Caštèl, ió éi menà fòra ra Croš e i doi farài e co sòn tornà da òta ‘l èa ora de móa danóo, éi ciarià el Marigo Agnèl e Paolo Partel e la fòra ‘l èa tanta šènte

che špetàa, 'na fré dapò 'l é ruà chi pize da šcòra e m'èi fato "inpreštà" doi pize da rešpònde Mesa, i èi dà anche 'na bònàmàn, da res òto e trèntazinche s'òn moéšte co ra Portišión e da res nóe e vintezinche seón davànte Jéja de San Nicolò. Tiziana Bašilia r'à sonà Mesa e el Pioàn a prèdica, cemòdo che 'l fèš de sòlito, 'l à dito alcuànta paròles che fèš pensà sora, 'l à recordà anche che, infinalménte 'l é suzedù da sèn ra profezia del Profeta Isaia, chel de şà dóimilenoèzènto ane, che diš che ... "vegnerà 'l tènpo che pašarà adùna el león e l'agnèl" ..., el s'intendèa ai doi Marighe de Règola Òuta, el León e l'Agnèl che par cajo i s'à ciatà a fei i Marighe inze 'l štésò an. 'L èa anche el prèe nóo don Alberto. Ignànte magnà, adùna coi mè Šeniche, el Marigo de Anbrizòra e un sò Šenico, ón parecia ra lištes pa ra votaziós del vintesié de otóbren par cambià doi rapresentàntes de Règola. Da meşodi a dišnà dute adùna, poche, èi dito doa paròles de gramarzé a dute e èi recordà danóo che ra Règoles s'è sènpre noštres... piàn, piàn i si n'é şùde debòto dute, io e 'l mè secondo Šenico Luštro e Stefano Basilio s'òn beù ancora algo e da res tré e mèşa sèe a ciàşa. Da da sera da res sié e mèşa fòra in štaziòn a parecià par ra Fèšta del Dešmontèa de sabeda ai 11 de otóbren, son şùde a se bée algo e da res nóe sèe a ciàşa.

10 de otóbren, véndres: ancói bonóra a pagà conte a ra Sozietà e in Casa Rurale, són pasà in Règola ai portà ra lišta dei gnòmes pa ra votaziós del 26 de otóbren, ón vardà drio che sée dùto a pòšto, ei anche ciatà Primo Bisi e 'l ei preà se 'l me fèš i cònte par ra sesiòn ordenaria de Rapreşentànza de dapò i Sante, 'l à dito de ši. Da daséra danóo fòra in štaziòn a dešciarià ra ròba da magnà e da bée par domàn, ón laà ra tòures e betù a pòšto chél che manciàa, són beù 'na bira e da res sète e mèşa sèe a ciàşa.

11 de otóbren, sàbeda: Fèšta del Dešmontèa; da res sète sèe in štaziòn ai dià a Guido Diorništa a parecià par tacà i bešteàme e a fei i dèdui da béte inze ra fédes e ra ciòures e anche i cavài pize del Menegùto, intór res nóe e mèşa 'l à šcomenzà a ruà i prime bešteàme e i cavài del Menegùto, 'l é ruà ra fédes, ra ciòures e piàn, piàn s'à inpieni dùto, vinte cavài e setànta ciàe, aprespóco sesànta fédes e diéš ciòures, pites e conie, 'l èa 'na beléza a vardà, dùto što piazàl pién de bešteàme e tànta, tànta şènte, 'l é ruà i pize da šcòra che i s'à godù pi de dùte, intànto calchedùn pareciàa da magnà e da res undeš el presidènte da ra comişiòn agricultura, Menegùto, 'l à dito dóa paròles de gramarzé bén a dùte i pàor che à portà là i sò bešteàme, el nòš pioàn don Davide, 'l à benedi i bešteàme e ra machines da lourà ra tèra e ra fèšta r'é šcomenzàda, da magnà e da bée par dùte, ra banda r'à sonà algo, de fòra e de inze e pò 'l é ruà i sonadóre, pi tarde dùte s'à menà via ra sò bešties e ra şènte s'in'é şùda a ciàşa, són vanzàde de alcuànte, i sòlite, són beù ancóra alcuànta bires e da res sète ió m'in són vegnù a ciàşa, alcuànte de òutre i é şùde inze a ra Era, là da chél che vènde da magnà a da bé dapò i é şùde fin sù in Sènes, i à fàto tarde...

12 de otóbren, domégna: da res nóe sèe danóo in štaziòn a šturtà sù, adùna con Stefano Bašilio e Guido Diorništa, 'l é vegnù fòra òto, diéš sàche de špazadùres, ón

ciarà duto sul tratòr del Bašilio e dapò dišnà 'l menàa duto inze a Fiàmes, ra ròba dei Seštière, da mèşodi sèe a ciàşa.

13 de otòbre, lùnes: Dapò dišnà ió e mè fiól Johannes, sòn şùde sù a l'Oşpedà a tuói i dói Sante da portà danóo şò in Règola, da chera éi şvoità ra caséta de i donatìe de ra ciandéres.

14 de otòbre, màrtes: da bonóra in Règola a comedà alcuànta cartes, dapò fòra a Piàn da Lago in Casa Rurale a pagà alcuànte cónte e a fèi un donatio al "Soccorso Alpino" e a béte via i sòde dei donatìe de ra ciandéres de l'Oşpedà, dapò a parlà col mè secóndo Šenico Luštro gòuja ra paštùres e ra merènda del di de ra votaziós del vintesié de şto més. Vès séra éi telefonà a dute i pàor forèšte par şì a şcòde ra paštùres sàbeda che en.

16 de otòbre, şóiba: da bonóra fòra a Piàn da Lago in Casa Rurale a comedà un cónto; i donatìe de ra ciandéres de l'Oşpedà, m'aée falà ai contà, dapò dišnà sòn şù via dal Partel a şcòde ra paštùra e a me tuói ra ciàines e ş'èi anche laàdes.

17 de otòbre, véndres: sòn şù şò a Ciànpo da Alessia Péta a şcòde ra paštùra dei sò zinche cavài, sòn pasà al Lovat par parlà con Guerino Bròco par ra merènda de 'l di de ra votaziós, el no n'èa, sòn pasà in Règola a véde se 'l èa duto a pòsto, sènpre par ra votaziós?!?... I ei domandà al Lète gòuja i contribùte, soméa che piàn, piàn i mi dàghe, éi ciatà anche el mè prin Šenico Diorništa, el m'à contà alcuànta ròbes gòuja i projète de l'Oşpedà... da daséra sù in Sènes a zéna de agnèl con dute chi de ra fédes, éi invidà anche Nicoletta, una toşa veneziàna inamoràda de ra nòstra mόνte; da res sète e mèşa a Ra Štua e pò su co r'automòbile, ió sòn montà col Luštro, ón magnà gràn polito, Caterina r'à sonà 'na fré 'l fòl e ón ciantà dute adùna e ón anche beù, 'l é ştà bèl, fin res dóes e mèşa, da res tré e mèşa sèe a ciàşa.

18 de otòbre, sàbeda: adùna con i doi Šeniche, Diorništa e Luštro sòn şùde a şcòde ra paštùres e a se tuói ra ciàines, in Val Badia e a S. Lorenzo, éi ofèrto ra sòlita beverèla a dute i pàor inze r'oštaria Traube, i é ştàde dute gràn contènte dei bešteàme monteàde, m'èi parmetù de i bâte şò 'na fré sul cónto da pagà, ştòutro an i montearà danóo dute cuànte. Sòn tornàde per el Plàn, Pèderù, Fodara e Senes agno che sòn magnà algo e s'in sòn vegnùde in şò, da res cuàtro seón a ciàşa. Pi tàrde éi laà duta ra ciàines con ra màchina da laà biàncaria.

19 de otòbre, domégna: ancuói bonóra éi betù in ordin i nùmere de ra ciàines e anche comedàdes dutes, chéres che aée fin ancuói.

20 de otòbre, lùnes: ancuói bonóra danóo in Règola a véde se manciàa algo pa ra votaziós de domégna, éi parlà con Ida, sòn pasà al Lovat a parlà col Bròco pa ra merènda de ra votaziós, éi pagà alcuànte cónte e sòn şù fin a Piàn da Lago in Casa

Rurale a portà i sòde de ra paštùres che éi šcodù sàbeda pasà e a me refónde conte che aée pagà ió.

22 de otóbren, mèrcui: da daséra sesión de giúnta da res siè e mèša fin res nóe.

24 de otóbren, véndres: da bonóra sòn šù su a Fraina dal Menegùto a šcòde ra paštùres dei sò bešteàme, arméntes e cavài, dapò dišnà éi parlà col mè secóndo Šenìco Luštro de alcuànta ròbes de Règola Òuta, dapò éi portà dùta ra cartes dei cónte a Primo Bisi e ón vardà fòra 'na fré dùto, 'l é drio a parecià i cónte pa ra sesión de Raprežentànta de dapò i Sante, sòn pasà in Regola a véde se 'l èa dùto a pòšto pa ra votaziós de domégna ai vintesié de otóbren.

25 de otóbren, sàbeda: ancuói bonóra da res diěš, adùna con ra deputazión sòn šùde fòra a Fraina sul pòšto, invidàde da chi del Golf, a véde i laóre che i à fato, un gràn laóro, i m' à menà a véde dùto 'l širo e a ra fin i m' à invidà sù dal Menegùto a se magnà algo, una sòrte de beberèla, intanto 'l é vegnù res tré dapò mešodi.

26 de otóbren, domégna: di de ra votaziós par béte doi regoliére in Raprežentànta de Règola Òuta ; da res òto sèe in Règola con chi òutre zinche, Marigo e Šenìche, no n' èa el Marigo de Anbrizòra?!? Ón parecià ra càrtes par votà e da res òto e un cuàrto 'l é ruà i prime regoliére a votà, 'na fré dapò de doi i é šùde via dal Lovat a tuói ra merènda che aée ordenà, i regoliére votàa e de alcuànte šia sù de sóra a se bée algo, a se magnà 'na pàšta e a se ra contà, i à votà fin res dódeš e un cuàrto, dapò ón šcomenzà a contà i vote, 277 in dùto, e dùto chel che và drio 'na votazión, da un óra e mèša aeón feni dùto, 'l é štà betù in Règola Òuta de Lariéto; Renato Zangiacomì Zachèo e Amedeo Bernardi Agnèl, i éi ciamàde, cemòdo che 'l é ušànta par i fei saé ra nóa, el Zachèo no n' èa, 'l éi ciamà da daséra. Sòn šùde sù a l' Ošpedà a se magnà algo e a tornà da òta sòn fermà inze a Ra Era a se bée ancora algo, no n' aón beù asèi!?!... da res sète e mèša sèe a ciàša, štràco...

28 de otóbren, màrtes: ignànte mešodi sòn šù da Angelo Bròco a šcòde ra ultima paštùres, sòn pasà in Règola ai portà dói cónte e dute i cónte de ra paštùres par podé mandài ra fatùres ai pàor, là éi ciatà Sergio del Vècia e ón parlà 'na fré de ra Fèšta del Dešmonteà, dei prèmie, sòn pasà al Lovat a véde se 'l m' aée parecià 'l cónto de ra merènda de ra votaziós, el no n' aée parecià nuia, sòn pasà šò da ra Šcòra Popolàres a me tuói i laóre dei pize, dišégne e šcrite, sòn šù fòra a Piàn da lago in Casa Rurale a béte via i sòde de ra ultima paštùres e a pagà dói cónte, sòn pasà a parlà col mè secóndo Šenìco Luštro gòuja i prèmie dei pize, a tornà da òta danóo in Règola ai portà i šcrite a Angela Nita, che adùna con Rosa de Vico, es vardarà drio par i prèmie dai dà. Dapò dišnà dapò sepoltùra danóo in Règola ai portà òutre šcrite a Angela, che m' aée lašà intrà i dišégne, coši éi podù parlà anche con Michele, diretór del Parco, gòuja i špùrghe de Ra Štua, 'l èa 'na fré štizà gòuja chera létra che i ón mandà de alcuànte Marighe, el voréa molà dùto, el s' à sentù betù da bànda pizora e che sée el ra gòuja de chel che no và bèn inze ra Règoles, ió éi vardà del fèi

parsuàšo che ra no n'è coši, che ra létra no n'èa par el, Michele Da Pozzo, ma par dùto 'l goèrno de ra Règoles, che, par chel che me pàr a mi, 'l é algo che no và bén. A ra fin sòn betù dacòrdo co ra bònes, a parlà se s'intènde e dùto se coméda. Intanto là 'l èa el Menegùto coši éi parlà anche con él de ra premiación dei školàre, éi ciamà Emilo Bassanin par me béte dacòrdo cànche vardón fòra i dišégne.

29 de otóbre, mèrcui: ancuói bonóra éi feni de béte i nùmere a ra ultima ciàina, adès s'è pròntes par unòutro an, pi tàrde ei vardà drio i dišégne dei pize de ra Fèšta del Dešmontèa e éi parecià 'na fré de nòta par béte šò chi che vénze, dal prin al cuinto.

30 de otóbre, šóiba: ancuói bonóra sòn pasà in Règola a parlà con Angela Nita gòuja i šcrite dei školàre, m'èi fato dà dal Lète ra còpies de ra votaziós de domégna pasàda, éi ciamà Bèpe Rišcia par saé se 'l aéa tòche de compensà par tacà sù i dišégne pi gréi de chi pize da šcòra, el mi pòrta dapò mešodi. Infatti alòlo dapò dišnà 'l é ruà e coši éi betù apòšto dói dišégne de chi gréi.

31 de otóbre, véndres: štanóte 'l à gneegà, 'l é un tenpàto, alòlo bonóra sòn šù a tuói Emilio Bassanin par vardà drio i dišégne dei pize da šcòra; 'l èa intrigà pi de mé a curà fòra zinche dišégne par šcòra, el tórna ancóra 'na òta ai béte in ordin. Dapò sòn šùde šò da ra šcòra mešana a vardà l'ultimo laóro dei pize, éi abù da lašàlo là, gòuja che 'l èa màsa gràn, dapò sòn pasà in Règola a me tuói i šcrite che aéa vardà fòra Angela, ma r'aéa capì malaménte e me tociarà tornà. Dapò mešodi sòn tornà in Règola a me tuói i šcrite e i éi portàde sù a Rosa de Vico, 'l é senpre un piàzer par mé parlà con Rosa.

3 de noènbre, lùnes: vès mešodi m'à ciamà Primo Bisi che vade a me tuói el rešocónto dei cónte de d'autón, sòn šù alòlo e 'l m'à špiegà 'na fré dùto, vanzàa una fatùra ancóra da pagà. Dapò dišnà sòn šù in Règola a vardà fòra i cónte col Lète, 'l èa una fatùra del Santuz de ra portišión de l'Ošpedà de d'aušùda, domàn širéi a ra pagà. Ei avišà Ida de ra sesión del cuàtro de noènbre.

4 de noènbre, màrtes: ancuói bonóra sòn pasà in Regola a me fei fèi dóa fotocòpies e a me tuói dói Laude da i dà ai doi raprešentàntes nòe e pò sòn šù inze pištoria del Santuz par pagà i conte vanzàde, m'èi parecià dùta ra càrtes pa ra sesión de Raprešentànza de da daséra. Da res òto sesión ordenària de Raprešentànza de Règola Òuta de Lariéto, ra durà fin mešanóte iuštes, ra pi lòngha o una de ra pi lònghes. A ra fin i doi raprešentàntes nòe, Renato Zachèo e Amedeo Agnèl, cemòdo che 'l é ušanza, da lanpasà, i à ofèrto da bée a dùte chi che 'l èa vanzà, póche...

5 de noènbre, mèrcui: éi ciamà el Bròco gòuja el contràto co ra Comunànza, Ra Štua e ra Règola Òuta de Lariéto, da daséra sesión da giùnta da res sié fin res nòe.

7 de noènbre, véndres: ancói bonóra da res òto 'l é mòrto don Giovanni Maria Belli, una gràn mala nóa, 'l èa vegnù r'ultima òta a benedi ra mόνte sù in Fòses ai zinche

de lùio cànche ón monteà ra fédes, el s'aéa pasà 'na bèla șornàda in compagnia con noșòutre, ió 'l aée vedù gràn štràco co 'l é ruà da ra Òta del Baràncio, éi abù gràn deșpiazér.

8 de noènbre, sàbeda: da daséra zéna de ra Comișiún Agricultura sù al Brite de Lariéto par chi che aéa lourà par béte adùna ra Fèšta del Deșmonteà, fin mèșanóte. No m'à sapù bèl, gòuja che no me piàje el luó.

9 de noènbre, domégna: ancuói bonóra da res diéș sòn șù sù in Pocòl a Méša del cuàtro de noènbre, davànte con r'autoritàs, ei menà sù Stefano Bașilio, Šenico de Anbrizòra, che 'l ciapàa el pòšto del Marigo Agnèl, che 'l manciàa danóo, dapò Méša sòn șùde a ra Staziún che, el Capocomùn 'l à ofèrto 'na beberèla a dùte. Chešto 'l é l'ultimo inpégno da Marigo, fin da Nadà.

10 de noènbre, lùnes: ancuói m'à telefonà el mè secóndo Šenico Luștro par me fèi saé che sàbeda séra 'l é ra zéna de Anpézo Òași via in Valbòna e che sèe invidà, ma ió no pos și, gòuja che no sòn cà.

11 de noènbre, màrtes: alòlo bonóra sòn șù fòra in ștanparia dai Bașilie gòuja i ateštàte par i pize da șcòra, dapò dišnà 'l é vegnù Paola China a me portà i laóre che à fato i pize de ra Šcòra Popolare Montessori de Zuèl e pò sòn pasà in Règola a firmà alcuànta càrtes de ra Règola Òuta, cónte da pagà e par r'àga de l'Oșpedà, e i éi portà i ultime șcite dei școlàre de Zuèl e dapò sòn șu sù da Rosa de Vico ai damandà se ra me șcrie alcuànte gnòmes sui ateštàte, sòn ștà là un bèl tòco a ciacolà con éra e ra m'à moștrà cuadèrne e șcite de sà màre e de sò nòno cànche i șia a șcòra, del mileòtozènto.

12 de noènbre, mèrcui: alòlo bonóra sòn pasà in ștanparia a véde se 'l èa prònto el șchizo dei ateštàte, i no n'èa prònte, dapò sòn șù a tuói Emilio Bassanin par curà fòra i dișégne e fei ra lișta de chi che vénze par ra premiaziún, dapò fòra in Règola ai portà i șcite a Angela Nita, chi de ra șcòra de Zuèl, éi parlà con Michele, diretór del Parco, gòuja el șpùrgo de Ra Štua, Valón Šcuro, e coși 'l é vegnù meșodì. Dapò dišnà in Règola a școtà l'avocato Trebeschi e 'l sò colèga par afàre e ràdeghe che à ra Comunànza con regoliére, m'èi anche șcrito șò ra clasifica del concórso de ra "Fèšta del Deșmonteà".

13 de noènbre, șóiba: alòlo bonóra sòn pasà in ștanparia a véde se 'l m'aéa parecià i ateštàte, el mi pareciàa par domàn, i éi telefonà a Paola China se ra pasàa era a si tuói co ra lișta dei gnòmes da șcrie, coși r'à fato. Ió sàbeda bonóra móo co ra mè fémena par 'na setemàna, tornaréi sàbeda ai vintedói.

23 de noènbre, domégna: finche sèe via m'à telefonà Paola China par me fèi saé che samàre, Șaria, r'aéa feni de șcrie i gnòmes sui ateštate e che se 'l èa bișòign ra șcriéa ancóra.

24 de noèmbre, lùnes: ancuói bonóra sòn şù fòra a Piàn da Lago par i fate miéi e coşi éi parlà con Dino Dantògna, in ştanparia, gòuja ra fotografies pa ra premiación de ra Fèšta del Deşmunteà, dapò éi parlà col mè secóndo Şenico Luştro che 'l m' à moştrà i prèmie dei pize da şcòra, intanto m' à telefonà Paola China e sòn şu sù a ciàşa sóa a me tuói i ateştàte che sà màre Saria aéa şcrito. Alòlo dapò magnà 'l é ruà Dino Dantògna a fotografà i laóre de chi pize, pi tarde Paola China m' à portà i ultime ateştàte che aéa şcrito sà màre, ra mè fèmena r' à şcomenzà a şcrie sui ultime ateştàte vanzàde e da daséra Dino m' à portà el dişco con ra fotografies che 'l aéa fàto, aée anche parlà con Giorgio Menegùto gòuja ra premiación.

25 de noèmbre, màrtes: ra mè fèmena r' à feni de şcrie i gnòmes sui ateştàte e ió m' éi vardà fòra ra fotografies, gràn bèles, m' éi betù duto in ordin ra càrtes pa ra premiación dal prin al ultimo e da daséra da res sié e mèşa sesiòn de giunta e dapò sesiòn de Deputación fin res undeş e mèşa. El presidente, Cinzia de Ugo de Antonia, m' à fato saé che véndres ai dódeş de dezèmbre vegnarà fata ra zéna de ra Règoles su a Rù de ra Jères (Rio Gere).

26 de noèmbre, mèrcui: m' à telefonà Giorgio Menegùto gòuja ra premiación de ra Fešta del Deşmunteà e coşi i éi portà alcuànta càrtes de ra clasifica e el dişco de ra fotografies, sòn pasà in Règola ai portà càrtes al Lète, éi parlà anche con Alessandra Nànda par saé agno béte i laóre dei pize da şcòra, éi parlà con Michele Da Pozzo gòuja el şpùrgo de Ra Ştua, pòşto che m' è ruà el preventivo da Marco Minèl (Panza), da daséra éi ciamà el mè secóndo Şenico Luştro par senti ce che 'l dijéa el del prèzio che 'l m' à fàto.

27 de noèmbre, şóiba: ancuói éi ciamà anche el mè prin Şenico Diorništa par i fei saé del preventivo del Minèl, par el şpùrgo del Valón Şcùro.

28 de noèmbre, véndres: ancuói bonóra éi portà in Règola i dişégne dei pize da şcòra, dapò sòn pasà in piştoria dal Santuz, gòuja cónte ancóra da pagà de ra Portişiòn de l' Oşpedà, ma no n' éi combinà nuia, sòn pasà danóo in Règola e co sòn ruà a ciàşa 'l èa Bèpe Rişcia che se menà via chi òutre laóre gréi dei pize da şcòra de ra "Fèšta del Deşmunteà". Da daséra sesiòn de Comişiòn Agricultura da res òto fin res undeş e mèşa. Guido Diorništa 'l à abù algo da dì sul contribùto che ra Regola Òuta de Lariéto i à dà a ra Comişiòn Agricultura, che no şpetàa al Marigo dezide sé e cuànto i dà, che 'l èa da pasà par ra Rapreşentànza, ignànte de dezide, ma foş el no s' à recòrdà che i aée damandà anche a el ra sò pugnón e che 'l aéa dito de ši. 'L é vegnù cuarànta zentimetre de gnée.

29 de noèmbre, sàbeda: Sul meşodi m' à ciamà el Menegùto gòuja ra sesiòn de anséra, de ra Comişiòn Agricultura, 'l é ciacolés par el paés gòuja i beşteàme che 'l à menà a ra Fèšta del Deşmunteà, màsa , par calchedùn, a ra fin 'l é sólo ciàcoles, invidia, che no fèş Bén a negùn.

30 de noèmbre, domégna: ancuói 'l é štà ra premiación de ra Fèšta del Dešmontèa, da res nóe e mèša 'l é pasà cà Stefano Bašilio a me tuói co ra jeep gòuja che 'l à danóo gneegà štanóte. Són ruàde a Pònte de ra Zèsa (Pontechiesa) inze 'l vècio magasén da ra Règoles, Alexander Holl, là 'l èa el Menegùto, Sergio del Vècia e 'l Marigo de Anbrizòra Luciano Agnèl, ón parecia 'na fré dùto, prèmie dei pize e i prèmie dei pàor, intór res dièš e un cuàrto ón šcomenzà, el presidente Menegùto 'l à dito alcuànta paròles; gramarzé bén soraldùto ai pàor che i à menà i sò bešteàme a ra fèšta, che i tién duro co ra štàles e i arlèa ancóra bešteàme, e dùte chi che m' à dià a béte adùna ra fèšta con sòde e laóro e un gramarzé 'na fré pi gràn a ra Règola Òuta de Lariéto che par ra prima òta ra dà alcuànte sòde de contribùto, 1500 €. Ón šcomenzà a premià i pàor, dódeš in dùto, manciàa el Partel, pecà...! Són šùde inavànte coi pize da šcòra che i èa dùte inze sàla co ra sò maéštres, Sergio ciamàa i pize e un aperòn, ió e 'l Agnèl, i dói Marighe de Règola Òuta, i ón dà i prèmie a dùte, cemòdo che voréa el Menegùto, Presidente de ra Comišíon Agricoltura. 'L é štà una gràn bèla fèšta, m' à sapù gràn bèl premià chi pizéte e digo ra verità, aée un grópo inze 'l còl a véde chište pizéte contènte come pašches e dùte che petàa ra màs. Da res undeš aón feni dùto, nò dapò de i aé contà chéra del Profèta Isaia, chéra del león e del agnèl, pecà che manciàa danóo calchedùn... ra Règoles e anche el Comùn, pecà...! Són šùde a se bée algo sù inze oštaria e da res undeš e mèša sèe a ciàša con Stefano Bašilio.

2 de dezèmbre, màrtes: ancuói éi ciapà i buòne da ra Sozietà Coperatia, chi dei sòzie, pòšto che ra Règola Òuta de Lariéto r' é sòzia de ra Coperatia, zèntosesànta €. in dùto.

4 de dezèmbre, šóiba: S. Barbara: i ponpiére m' à invidà a ra sò fèšta, da res sié e mèša da daséra a Méša šò da ra Madòna, dapò fòra in cašèrma par 'na beberèla, un gràn bèl parécio. 'L é štà bèl, da res òto e un cuàrto sèe a ciàša.

5 de dezèmbre, véndres: són pasà in Règola a portà cònte, dapò a ra Sozietà Coperatia gòuja i buòne dei sòzie, dapò in pištoria Santuz par i cònte de ra Portišíon de l' Ošpedà, infìnalmente éi podù pagà, in Casa Ruràle e pò danóo in Règola, éi ciamà dùte i pàor de Anpézo che à monteà a Ra Štua gòuja i contribùte par ra paštùres.

6 de dezèmbre, sàbeda: chel che éi fato ancuói bonóra no n' à nuia in comuniòn co ra marighéza, ma vói ištéso tieni nòta; ancuói ai sié de dezèmbre 'l é S. Nicolò, ra fèšta dei pize, e són šù a féi S. Nicolò a ra Šcòra Popolàres, viešti da S. Nicolò. M' à sapù gràn bèl tornà inze chera šcòres agnóche da pizo aée inparà a liéše e a šcrie, šà zincuàntaòto ane... Inze Aula Magna 'l èa dùte i pize de prima che me špetàa šentàde šò dùte dintorno, cànceh són ruà su ra pòrta i m' à saludà con un salùdo che m' é vegnù un grópo, i éi saludàde e éi dito doa paròles de ocajión, cemòdo che aràe fato S. Nicolò, chel véro... i éi dà a dùte un dóno, un cadaùn e dùte à dito gràzie col

cuòre, e a dùte i éi fato miùca sul mùs, i m'aéa parecià anche un sonéto par anpezàn dùte adùna, che ió no n'èi capi una paròla gòuja el rinbónbo che 'l èa ize chéra sàla. M'à sapù gràn bèl. Dapò són şù fòra a Piàn da Lago e éi parlà col mè secóndo Šenico Luštro de ròbes de Règola.

7 de dezènbre, domégna: ancuói m'èi copià şò el verbàle de ra sesiòn ordinària de Raprežentàntza del cuàtro de noènbre del 2008, tré ores.

9 de dezènbre, màrtes: éi fato el şiro par me tuói su ra nòta dei bešteàme monteàde a Ra Štua, via dal Partel, intànto m'à ciamà el Marigo Agnèl gòuja ra zéna dei Soutèš, e pò m'à ciamà anche el Menegùto che 'l se ranjàa co ra nòta dei bešteàme, no són štà bòn de parlà con Alessia Péta, ra no m'à rešpondù al telèfono in dutaldi.

10 de dezènbre, mèrcui: alòlo bonòra in Règola, sènpre gòuja ra zéna dei Soutèš, éi parlà col Lète gòuja i contribùte de ra paštùres e éi parlà con Marco Minèl, che 'l èa là par cajo, par chel špùrgo del Valón Šcuro a Ra Štua. Da daséra sesiòn de giùnta e saràe štà anche sesiòn de Deputaziòn ma 'l èa masa gnée e de alcuànte à telefonà che i no vegnia, dónca el Presidentè 'l à fàto telefonà a chi òutre che i s'in štàghe a ciàşa, r'à durà da res sié e mèşa fin res òto e mèşa.

12 de dezènbre, véndres: da daséra da res òto zéna da ra Règoles su da Nicola Šmàlzo a Rù de ra Jères, (Rio Gere) fin un óra e mèşa, ón magnà gràn polito, seón de una zincuanténa.

13 de dezènbre, sàbeda: şta séra da res òto e mèşa 'l é štà ra zéna dei Soutèš su a Alverà al Camin, ió no són şù gòuja che sèe masa štràco gòuja ra zéna de anséra e pò aée da móe domàn bonóra, éi mandà el mè prin Šenico Andrea Diorništa.

17 de dezènbre, mèrcui: da daséra sesiòn de Deputaziòn da res òto fin res diéš, chera Deputaziòn che no n'ón podù fei ai diéš gòuja màsa gnée, el ghi'n à fato debòto tré mètre. Damàn m'in vado cuàtro, zinche dis co ra mè fémena, şón a se tuói 'na fré de vin.

20 e 21 de dezènbre, màrtes e mèrcui: 'l é vegnù danóo de pi de un mètro de gnée, són a cuàtro mètre e mèšo, aprespóco...

23 de dezènbre, màrtes: da daséra 'l é ruà cà a ciàşa Stefano Bašilio, secóndo Šenico de Anbrizòra, a me di che ra séra de Nadà el vién él a Mesa de mèšanóte, gòuja che 'l Marigo Agnèl 'l é marà e che 'l pasa cà a me tuói intór res undeš da daséra.

24 de dezènbre, mèrcui: són şù a Mesa de mèšanóte con Stefano Bašilio inze 'l banco de r'autoritàs, 'l èa el Presidente Cinzia de Ugo de Antonia, el Capocomùn e alcuànte loudaduós, ra Jeja r'èa piéna e 'l é štà gràn bèl anche pa ra Jeja tiràda a

nóo. Dapò Mésa Elsa de Zardin (Soriza) m' à ofèrto un brulè al bacuchè de r U.L.d. A, da res dóes sèe a ciàša.

25 de dezènbre, șóiba: di de Nadà, da res diësh a Mesa Grànda, in zi bànche de r' autoritàs, éi menà fòra Stefano Bașilio e dapò Mésa el Pioàn 'l à ofèrto 'na beberèla șò in Calònega. Sul meșodi éi ciamà i mè Šenìche par i fei i augùre de Nadà.

29 de dezènbre, lùnes: ancuói m' é ruà un cònto da pagà da ra štanparia de Piàn da Lago, un cònto che no sòn štà bòn de capì ce che 'l èa, éi ciamà el mè secòndo Šenìco Luștro ma gnànche el m' à sapù di de ce che se tràta.

30 de dezènbre, màrtes: éi ciamà ra štanparia de Piàn da Lago, Print Haus, éi parlà con Dino Dantogna gòuja chel conto che 'l m' à mandà, 'l èa i Laude nòe da pagà, che ió no saée nuia!?!... Ei portà dùto in Regola a Roberto Lète coși i éi fàto anche i augùre de bòn an.

31 de dezènbre, mèrcui: éi ciamà Stefano Bașilio se 'l vegnia fòra con mé al Te Dèum da daséra, el m' à dito che 'l Marigo Agnèl 'l é marà e che 'l é a Belùn sul oșpedàl e che 'l mé ciamà el dapò dišnà, infàti el m' à ciamà e 'l m' à dito che anche el s' à ciapà sù chera marèșes che 'l é intórno e che 'l no se ra sènte de vienì e che vegnarà Paolo Partel al sò pošto. Da res sète da daséra a Mésa e Te Dèum in zi banche de r' autoritàs, con ra nòștra Presidente Cinzia de Ugo de Antonia e Paolo Partel, el Capocomùn e dói Loudaduós, dapò res òto 'l èa dùto feni.

1 de jenàro del 2009, șóiba: da res cuàtro e mèșa sòn pasà a tuói Stefano Bașilio, secòndo Šenìco de Anbrizòra e sòn șùde a Mesa del prin de l' an. El Marigo Agnèl 'l é sènpre marà.

2 de jenàro, véndres: m' à ciamà Giorgia Minèla, ra voréa saé algo de pì de ra Jeja de l' Oșpedà par el consòrziò "Cortina Turismo" e se ra podéa me ciamà ancóra par òutra nòes.

3 de jenàro, sàbeda: m' à telefonà chi de l' Oșpedà, ma ió aée el telèfono študà.

4 de jenàro, domégna: éi ciamà ió l' Oșpedà e ra m' à dito che i s' aéa jazà r' aga ma che intànto i r' aéa anche deșjazàda. El 'mà anche dito che i s' à róto ra màchina da laà piàte e che saràe beșòign de canbiàra, pòșto che r' à anche dijasète ane. Ei parlà col mè secòndo Šenìco Luștro par saé ce che aée da fei, el m' à consilià coși: éi ciamà danóo Paolo e i éi dito che 'l fèje fèi doi preventive e che dapò ra cronparón nóa.

8 de jenàro, șóiba: éi ciapà una letra da ra U.L S.S. gòuja r' aga de l' Oșpedà; i me șcrie che, dal vintedói de dezènbre, coși r' é datàda ra létra, sù a l' Oșpedà no se pó pi dorà r' aga de l' acuedóto par fei da magnà e inze oștaria, e che 'l é da portà r' aga co

ra sées, e che ra sée bòna!!!... Ei ciamà alòlo i mè doi Šenìche; Andrea Diorništa e Alberto Luštro che i me dighe algo, dapò éi ciamà Ludovico Biajo che 'l m' à betù 'l cuòre in pàš. 'L èa dešpiajù anche el, gòuja che 'l s' à dà da fèi par chešta àga, e 'l m' à garantì che domàn el parla alòlo con chel iušto e che 'l me fèš saé. Aée anche ciamà su a l' Ošpedà par i fei saé ra nóa. 'L é debòto otànta ane che su a l' Ošpedà se bée che r' aga là... con tanta de anàliži dóa òtes a l' an...

9 de jenàro, véndres: dapò mešodi, dapò laóro, són šù su a l' Ošpedà a parlà con chi pize de Zàn, ma lasù no n' èa negùn, i éi telefonà e són šù a ciàša sóa a Ciàe, là éi parlà con Renzo e Alberto del ràdego de r' àga, špetón a véde ce che suzedarà... i éi dà el via par cronpà ra machina da làa piàte.

14 de jenàro, mèrcui: m' à ciamà el mè prin Šenìco Diorništa par me di che i è šùde, el e Ludovico Biajo, sù a l' Ošpedà a tuói doa bozètes de àga da analižà, àga de brénto... da daséra sesión de giùnta da res sié e mèša fin res òto, dapò sesión de Deputaziòn fin res undeš.

15 de jenàro, šóiba: ancói bonóra són pasà in Règola ai portà cònte da pagà a Roberto Lète; (dichiarazion dei redite par el 2007).

19 de jenàro, lùnes: fèšta de vóto; ancúoi bonóra da res nòe e mèša in portišión da ra Jéja de Saiàco fin šò da ra Madòna, (ra prima òta in portišión) Mésa Grànda in zi bånche de r' autoritàs, 'l èa el Vešcovo Monsignor Giuseppe Andrik e un grùn de prèes. Ignànte portišión éi parlà col Presidènte e col vize par chel ràdego che 'l é, par chi sòde che ra Rejón del Veneto r' aràe dai dà a ra Regola Òuta de Anbrizòra par ra štàla che i é drìo a fèi sù, sù a Fedèra; (ricorso al T.A.R.). da res undeš e mèša sèe a ciàša. (ancúoi 'l èa danóo el Marigo de Anbrizòra Luciano Agnèl, dapò de ra maratìa).

22 de jenàro, šóiba: šta séra sesión de Deputaziòn da res òto fin res dièš.

28 de jenàro, mèrcui: éi portà alcuànte cònte in Règola, dapò dišnà m' à ciamà el mè prin Šenìco Diorništa par me contà ra ultima nòes de l' Ošpedà, gòuja r' àga e i projète.

29 de jenàro, šóiba: dapò dišnà m' à ciamà Giorgio Menegùto gòuja un šcrito de Evaldo Ghèa, un dei Sindache de ra Deputazòn, sun «Ciàša de ra Règoles», dal titolo «REGOLE ALTE – QUALE DEMOCRAZIA ?» che parla de ra dóa Règola Òutes, che, a sò dir, res no n' è aminištràdes polito, e che a sò mòdo de véde 'l é una «casta»... una paròla dura, foš 'l èa mèò che 'l se fajése capi òutramènte, el Menegùto no n' èa màsa parsuàšo. Da daséra 'l é ruà cà a ciàša Stefano Bašilio, secóndo Šenìco de Anbrizòra, anche el štizà par chel šcrito, pòšto che són ciamàde in gòuja come Marighe e Šenìche e che 'l é dai rešpònde polito, ra dóa Règolea Òutes

adùna, che i regoliére sèpe che ra no n'è coši. Me fèjo de merevéa che Evaldo Ghèa èbe šcrito chel che no n'è véro.

30 de jenàro, véndres: dapò d'aé parlà col mè secòndo Šenìco Luštro, éi telefonà su a l'Ošpedà gòuja el gnée sùn cuèrto, che'l no me pare šò i camis, con chera gneèra che 'l é što an, foš che sarà bišòign de biciàlo šò.

4 de febràro, mèrcui: da daséra sesión de giùnta da res sié e mèša fin res òto e mèša.

5 de febràro, šóiba: da daséra sesión de Comišión Agricultura da res òto e mèša fin res diéš e mèša.

7 de febràro, sàbeda: Renzo de Zàn m'à portà i preventive e ra càrtes de ra màchina da laà piàte nóa. 'L à gneegà danóo, no se sà pi agnó 'l béte...

9 de febràro, lùnes: dapò dišnà, dapò laóro, són šù via a Rònco dal mè prin Šenìco Diornìšta gòuja ra pràteghes de l'Ošpedà, par ra sesión de Raprežentànza de domàn da séra.

10 de febràro, màrtes: da daséra sesión de Raprežentànza de Règola Òuta, da res òto fin res diéš e mèša.

11 de febràro, mèrcui: alòlo bonóra in Règola a parlà con Michele Da Pozzo, sènpre gòuja chel nominà špùrgo del Valón Šcuro a Ra Štua, ón ciacolà par trecuàrtedóra e 'l m'à špiegà alcuànta ròbes che ió no saée. Ei parlà con Roberto Lète par alcuànta cartes e col sacretàrio Stefano de ra Becaria par ciamà danóo sesión de Raprežentànza.

16 de febràro, lùnes: éi fàto mandà via i invite par ra sesión de Raprežentànza de šóiba ai 19 de febràro.

19 de febràro, šóiba: da daséra sesión de Raprežentànza da res òto fin res diéš màncò un cuàrto. 'L èa là con nós Michele Da Pozzo, diretór del Parco, par me špiegà, una òta par dùtes, cé che se pó o no se pó fèi.

20 de febràro, véndres: da bonóra in Règola col mè prin Šenìco Diornìšta a parlà con Diego Tomáš gòuja l'albèrgo de Piàn de Lóa, par saé cuanto gràn che 'l é par fèi 'na sòrte de curarèzo d'aušùda. Pi tarde éi ciamà el mè secònde Šenìco Luštro par i fèi saé cemòdo che r'é šùda. Ei parlà anche col Lète gòuja ra seguraziòn sui fabricàte de ra Règola Òuta.

25 de febràro, mèrcui: m'èi copià šò 'l verbàle de ra sesión de Raprežentànza del diés de febràro pasà. Da da séra sesión de giùnta, da res sié e mèša fin res òto, dapò

sesión de Deputaziòn, coi undes nòe Marighe che vién inze lùnes de Pašca che vién, fin res nòe e mèša, dapò danóo sesión de giùnta fin res diés.

26 de febràro, șóiba: ancuói éi ciapà ra prima telefonàda par prenotà ra mόνte da monteà dói cavài da Obermajer e Grospitch, da Bornéco.

4 de màrzo, mèrcui: da bonóra sòn pasà in Règola a me tuói el libro dei verbàles de ra Règola Òuta de Lariéto, chel che và dal 1886 fin al 1999, Alessandra Nànda ra m' à menà șò sòte tèra inze ra ciàenes de ra Ciàša de ra Règoles, agnóche i ciàma "cavó"? Agnóche inze armère de fèr 'l é inze dùta ra cartes vèces de ra Règoles, dùte i documènte vèce dal 1200 fin ancuói, ra m' à moștra 'na fré dùto; ra vècia pergamènes dei Laude de Règola, libre, documènte de ògni sòrte, no n' aée mài vedù dal véro una pergaména, ma ș' é dùtes fàtes sù e leàdes con un nàștro, gòuja che res no n' à da ciapà màsa lun, 'l é mèò che res ștághe a șcùro. Dapò ra m' à dà el libo dei verbàles e sù inze ufizio éi parlà col Lète, sòn șù in Casa Rurale a tuói sòde pa ra seguraziòn dei fabricàte de ra Règola Òuta, éi parlà con Michele Da Pozzo gòuja ra centràles da fèi corènte, dapò a ciàša m' éi vardà fòra 'na fré chel libro, 'l é gràn bèl e interesànte, saé cemòdo che i aminiștràa ra Règola el sècol pasà, éi vedù che i fajéa tròpa sesiós de Rapreșentànza, anche 'na òta a ra setemàna o ògni diés dis, confòrme che i aéa da loudà, éi anche vedù che i diàa tròpo ai regolière poeréte che damandàa ra ... "suplica" ... par pi sòrtes de rajós; maratia, fiói, pize che và a șcòra, par beșteàme che moria e șò in driomàn, e ra Règola Òuta i dajéa ra ... "carità" ... aì, i ra ciamàa pròpio coși, carità...!?! Dapò dișnà i 'l éi portà danóo in Règola, el libro, e éi parlà 'na fré col sacretàrio Stefano da ra Becaria, ancora gòuja ra centràles da fèi corènte, ón zavàrie pensieròș co ra Rejón del Veneto... e con calche regoliér...!?

5 de màrzo, șóiba: 'l à danóo gneégà, sòn a sié mètre e zincuàntazinche zentimetre...

6 de màrzo, véndres: m' à ciamà el mè prin Šenico Diornișta par se ciatà dapò dișnà in Règola, gòuja r'aga de l' Oșpedà. Ei ciamà anche 'l mè secóndo Šenico Luștro. Da res tré sèe in Règola coi mè doi Šeniche, e intànto che șpetaón el Biàjo, éi firmà alcuànta cartes de ra seguraziòn dei fabricàte de ra Règola Òuta, un contràto nòo, éi firmà anche par pagà el cónto de ra machina nóa da laà piàte de l' Oșpedà. 'Na fré dapò 'l é ruà el Biàjo, Ludovico, e 'l m' à contà 'na fré cemòdo che r' é co șta U.L.S.S. e 'l m' à consilià de șcrie dirèto a ra Rejón del Veneto par fèi feni cheșta ștòria ștràgna, gòuja che cà 'l é calchedùn che no fèș el sò dovér. Ón rajonà un tòco a ra lòngra e ón dezișo pròpio de șcrie a ra Rejón par fèi varé i nòștre derite. Sòn șùde a se bée algo e s' in sòn șùde a ciàša.

7 de màrzo, sàbeda: m' à ciamà de Bornéco un pàor, nòo, par podé monteà tré cavài.

8 de màrzo, domégna: da daséra m' à ciamà Silvio Ménego par me fèi saé che su a l' Ošpedà ra Jéja r' é šcuèrta dal gnée, pichesée davànte agnoche 'l é ra pòrta e 'l aéa feštide par cànche 'l delegarà.

9 de màrzo, lùnes: dapò dišnà sòn şù su a l' Ošpedà a véde cuànto gnée che 'l é, i n' é tanto...! Intór ra Jéja 'l é òuto doi mètre, i n' é fin sóra ra pòrta, sarà da tiràlo via. Ei ciamà 'l mè secóndo Šenico Luštro che 'l me dàghe un consilio, 'l à parlà anche col Coletìn, che 'l èa là par cajo e ón dezişo de damandà a Guido Diorništa cé che 'l diş el, coşi 'l éi ciamà e sòn betù dacòrdo par domàn bonóra.

10 de màrzo, màrtes: da res òto sèe a l' Ošpedà con Guido Diorništa par véde cé che se pó fèi con chel gnée che 'l é intor Jéja. 'L é un gràn laóro, vo èse 'na màchina grànda e Guido 'l à dito che 'l s' interèsa el e 'l me faràe anche el laóro par de bàn, (iò no sòn dacòrdo). Dapò ón vardà el gnée de cuèrto, anche par el saràe da biciàlo şò, ma 'l é un ràdego con chera sòrte de baràca che 'l é davànte pòrta de cujìna. Ei ciamà i mè doi Šeniche par sentì anche ra sò pugnón, šta séra farón danóo un sòuto a l' Ošpedà, ió e 'l Luštro. Da daséra danóo su a l' Ošpedà col mè secóndo Šenico Luštro a véde sul pòsto cé che se pó fèi con chel gnée, pichesée chel sun cuèrto, ón parlà con chi de Zàn e 'l zavàrio 'l é chera sòrte de baràca che 'l é davànte ra cujìna che r' é pròpio sòte ra štrajégnés, saràe da fèi un cuèrto par sóra, ma 'l é un gràn laóro, vedarón cé che se pó fèi.

11 de màrzo, mèrcui: da daséra sesiún de giúnta da res sié e mèşa fin res òto, dapò sesiún de Deputaziún fin mèşanóte, 'l èa là con nós ra Comişiún Agricoltura par di ra sóa siu laóre da fèi su ra móntes.

13 de màrzo, véndres: da bonóra sòn pasà in Règola ai portà dóa cartes a Roberto Lète, éi ciatà là el mè prin Šenico Diorništa e ón parlà 'na fré gòuja el gnée sun cuèrto de l' Ospedà.

14 de màrzo, sàbeda: alòlo bonóra ei fato un sòuto su a l' Ospedà a véde chel laóro del gnée davànte ra Jéja, Guido Diorništa 'l aéa fato duto zénza me di nuia... 'l à fato un gràn bèl laóro, 'l à tirà via 'na màsa de gnée col sò tratór, dapò 'l éi ciamà par i di gramarzé bén, Guido 'l é sènpre prònto par ra Règola Òuta.

19 de màrzo, şóiba: m' à ciamà el mè prin Šenico Diorništa par me di che infinalmènte, somearàe, che ra pratega de l' Ošpedà ra pòse şì inavànte, gòuja che chi da ra ULS i à capì che r' aga r' é bònà, gramarzé bén anche a Ludovico Biajo che 'l s' à dà da fèi par deşbrigà şto ràdego. Ió sèe in Toscana alcuànte dis.

24 de màrzo, màrtes: da bonóra m' à telefonà Ludovico Biajo par me fèi saé che 'l ràdego de r' aga de l' Ošpedà el s' à comedà, infinalmènte se pó şì inavànte coi projète, i éi dito gramarzé e sèe duto contènto che cheşto braghiér 'l é feni. Dapò dišnà el m' à ciamà danóo, con malanóes, chi de ra ULS no vó zéde, 'l èa avelì anche

el gòuja che 'l no n'è stà bòn de vieni in nuia, èi ciamà el mè prin Šenico Diorništa par i contà ra nóa. 'L é vegnù anche el mè Cuiétro Rinaldo Zachèo a me portà i ultime cònte de ra fédes che ió i èi portàde a Primo Bisi da šcrie sui libre dei cònte. Da daséra sesión de giùnta da res sié e mèša fin res òto e mèša, el Lète m'à da alcuànte conte da pagà, dói del gnée de cuérto de l'Ošpedà, 'l èa mèo lašàlo sù... e ra létra de ra ULS che me dijéa chel che m'à dito el Biàjo

25 de mârzo, mèrcui: da daséra sesión de Deputaziòn da res òto fin res diéš.

26 de mârzo, ŝoiba: èi pagà dói cònte e èi parlà col mè secóndo Šenico Luštro gòuja ra fòula grànda de Raprešentànza de lùnes de Pašca e par pagà Guido Diorništa par el laóro che 'l à fato sù a l'Ošpedà drìo gnée. Pi tarde ei telefonà a Giudo che 'l me dighe cuànto che 'l é... el no vó nuia... (saée bén) sodišfaréi de calche vèr. Chište dis sòn drìo a fèi una soàša par 'na fotografia che ei fato što ištàde sù in Fòses cànceh on monteà ra fédes, vorée i ra donà a Sergio, el paštór de ra fédes. Da daséra me ciàma el Vizepresidènte Roberto Nuco par un càjo de alòšo; Laura de Òšia r'à bišòign in prèša de ciàša da calche bànda, gòuja che, adùna con sò fardiéi, i à da bicià šò ra sóa in prèša gòuja ràdeghe co ra "sovraintendenza" e ra domànda se 'l é pošibel i dà ciàša sù a l'Ošpedà par càlche més

27 de mârzo, véndres: da bonóra èi ciamà i mè doi Šeniche; Luštro e Diorništa par chera domànda de alòšo de Laura de Òšia, sòn ciatà fòra a Piàn da Lago inze ufizio del Luštro, on parlà 'na fré e on dezišo de i di de ši, anche se 'l é ra Raprešentànza de Règola che à da loudà, ma gòuja ra prèša on loudà nošòutre tré dùte dacòrdo de i dà alòšo alòlo. Dapò èi ciamà Roberto Nuco par i fei saé, 'l èa gràn contènto de chel che on fato.

28 de mârzo, sàbeda: ancuói m'èi parecià par ra sesión ordenària de Raprešentànza del 14 de aprile, mârtes dapò Pašca; ordin del di, e dùto chel che ei fàto da Marigo inze chešto an, una sòrte de relaziòn.

31 de mârzo, mârtes: alòlo bonóra in Càsa Rurale con Primo Bisi a fèi alcuànta operaziòs de bància, pàr podé feni i cònte de ra mè marighéza fin ai 31 de mârzo, gòuja i cònte del Cuiétro, che no n'aéa fàto ra operaziòs de chel che 'l aéa šcodù e de chel che 'l aéa špendù, èi pagà anche Guido Diorništa par el laóro del gnée che 'l à fàto sù a l'Ošpedà. Dapò sòn pasà in Règola a véde se 'l èa nóes. Vès séra m'à ciamà el mè prin Šenico Diorništa par me di che chel ràdego de Laura de Òšia, gòuja ra sò ciàša, el no sée feni, dónca no sarè bišòign de i dà alòšo sù a l'Ošpedà.

1 de aprile, mèrcui: èi ciamà el mè secóndo Šenico Luštro par me béte dacòrdo par ši a ciatà Sergio, paštór de ra fédes, 'l à dito che 'l mé ciàma el in ŝornàda.

6 de aprile, lùnes: èi ciamà in Règola pàr fèi mandà via i invite par ra sesión ordenària de Raprešentànza de mârtes ai 14 de aprile.

7 de aprile, màrtes: da daséra m' à ciamà Giorgio Menegùto par me di cemòdo che 'l é da fèi Vendres Sànto in Portišiòn, che ió no saée nuia.

8 de aprile, mèrcui: éi ciamà el mè secóndo Šenico Luštro par aé nóes par ra beberèla de r'ultima sesiòn de Raprešentànza da Marigo. Da daséra sesiòn de giunta da res sié e mèša fin res nóe e mèša. M' à ciamà Stefano Brunotti par monteà sié o sète cavài su ra nõštra mόνte, el voréa saé 'na fré cemòdo che r' é.

9 de aprile, šóiba: štaséra dapò laóro sòn šù su a l' Ošpedà a me tuói i dói farài par ra portišión de Védres Sànto

10 de aprile, Védres Sànto: alòlo bonóra éi portà fòra i farài inze Jeja par ra Portišión, dapò in Càsa Ruràle ai domandà gòuja el Marigo nóo, cemòdo che 'l é da fèi par i cónte, dapò in Règola a parlà col Lète e col sacretàrio. Da daséra Portišión del Védres Sànto, i dói Marighe de Règola Òuta davànte coi farài de l' Ošpedà, rà durà fin res òto e mèša. Inze Jeja éi ciatà Primo Bisi, el m' à parecià dute i cónte de Règola.

11 de aprile, Sàbeda Sànto: da res sète da bonóra sòn tornà sù a l' Ošpedà a portà i farài de ra Portišión de anséra, da res òto e mèša šò da Primo Bisi a me tuói i libre dei cónte e 'l m' à špiegà 'na fré cemòdo che se fèš. Da daséra véa de Pašca, Mésa Grànda inze i bånche de r' autoritàs, a ra fin inze Sacreštia a fèi i augùre a dùte, fin debòto res undeš.

12 de aprile, domégna de Pašca: alòlo bonóra da res sié e mèša m' éi copià šò i cónte dal libro dei conte sun chel de 'l Ošpedà, da res diéš a Mésa Grànda adùna con r' autoritàs, dapò mešodi m' éi copià šò sun chel de ra Jéja de S. Nicolò. Ancuói 'l é štà ra ultima òta che sòn šù fòra come Marigo a raprešentà ra Règola Òuta de Lariéto.

13 de aprile, lùnes de Pašca: alòlo bonóra da res sié e mèša m' éi copià sul libro dei cónte de r' aminištraziòn de ra paštùres, i ultime cónte che vanzàa. Dapò mešodi, dapò laóro, adùna con mè fiól Andrea, ió sólo no sèe bòn de ši inavànte, éi feni de fèi fòra i cónte sui libre dei cónte de Règola.

14 de aprile, màrtes: dapò mešodi adùna con ra mè fèmena m' éi parecià ra beberèla par dapò sesiòn de Raprešentànza, Barbara, mè neóda, ra m' à fato dóa tórtes, ofèrtes da éra, dapò éi portà duto in Règola; ra merènda, i libre dei conte e chel dei verbàles. Da daséra da res òto ultima sesiòn de Raprešentànza da Marigo, seón debòto dùte, manciàa sólo el sòlito Ghèzo e Marco Luštro che 'l m' aéa telefonà gòuja che 'l no podéa èse là, el mè secóndo Šenico Luštro 'l é ruà da res nóe e mèša da Bologna, brào! Sèe 'na fré ajità a lašà ra mè marighéza, ma ra sesiòn r' é šùda polito, éi dito gramarzé a dùte e bòn laóro al Marigo nóo Diorništa, un pensiér e un

gramarzé bén a Alberto Luštro, 'l é štà un gràn Šenico e no feniréi mài de i di gramarzé par chel che 'l m' à dià a fèi el Marigo, crédo e špéro, che dapò chešta ešperiènza fàta adùna pàr pi de un an, che vànze algo de pi intrà de nòs, pàr el, l' anpasà, ió sèe štà ... "un gràn bèl amigo" ... ió pòs di òutrotànto de el, gramarzé Šenico Luštro... A ra fin éi ofèrto ra sòlita Beverèla e 'l é štà gràn bèl, dapò sòn şùde a se bée algo de alcuànte e da un ora e mèsa sèe a ciàsa.

Fèi el Marigo, e 'l é un privilejo par chi che 'l pó fèi, 'l é štà una gràn bèla ešperiènza, anche se 'l é tanto da lourà;(vedi P. S.) inze 'l mè an de marighéza, a fei 'na fré de conte, éi lourà 701 ores pa ra Règola Òuta de Lariéto, intrà una ròba e r'òutra. Chešto el vo dì, cuàtro més de laóro del dì d'ancuói. Ei conošù un grùn de şènte e tante m' à dià a fèi el Marigo, éi inparà tànta ròbes che no n' arè mài sapù se no fajée el Marigo, éi abù gràn contènto da tànte regolière, pòs di d' aé fato 'l mè laóro mèo che éi podù, con sacrificio, ma tórno a dì, éi abù gràn contènto e se éi fàto algo che no n' à comodà a calchedùn, i préo de me pardonà. Un gramarzé anche a Roberto Lète, sènpre prònto co 'l é bişòign e al sacretàrio Stefano de ra Becaria.

Ei vorù šcrie chešto "diario" de ra mè marighéza, che r' à durà 387 dis, da martes dapò Pašca del 2008 a martes dapò Pašca del 2009, fòš pàr un mè caprizio, ma anche parché vànze algo par chi che vienarà dapò de mé, par i mè fiói e fòš anche pàr i neóde.

LAUS DEO SEMPER

Brite d' Anpézo ai 14 de aprile del 2009

Fiorenzo Gaspari León
Marigo

P.S.

Cuànto alo da lourà el Marigo ?

Inze l' an de ra mè marighéza del 2008, che r' à durà 387 dis, éi fato 701 ores de laóro, cošì mes par mes:

- Aprile: 25 ores, - Maşo: 70 ores,
- Şugno: 72 ores, - Luio: 45 ores,
- Agóšto: 109 ores, - Setènbre: 106 ores,

- Otób্রে: 98 ores, - Noènb্রে: 45 ores,
- Dezènb্রে: 25 ores, - Jenàro: 15 ores,
- Febràro: 19 ores, - Marzo: 27 ores,
- Aprìle: 32 ores.

*In duto fèš 701 ores, che, a fei 8 ores al dì sote parón, el vo dì
cuàtro mész de laóro, supòšò. Chešto 'l é chel che éi fato io inze
l'an de ra mè marighéza del 2008...!*